


DS  
796  
H2475  
1731  
v.9











西湖志卷之十八

古蹟三

吳山路

有美堂

名勝志在吳山頂宋嘉祐二年梅摯以龍

圖閣出守杭州仁宗賜以詩有地有湖山美之句

因名其堂歐陽脩爲記蔡襄書今故址不存而府

治後堂尚仍其名

歐陽修有美堂記嘉祐二年龍圖閣直學士尚書吏部郎中梅

公出守餘杭於其行也天子寵之以詩於是作有美之堂蓋取賜詩之首章而名之以爲杭人之榮然公之甚愛斯堂也甚久而不忘今年自金陵遣人走京師命余誌之其請至六七而不倦余乃爲



之言曰夫舉天下之至美與其樂有不得而兼焉者多矣故窮山水登臨之美者必之乎寬閑之野寂寞之鄉而後得焉覽人物之盛麗誇都邑之雄富者必據乎四達之衝舟車之會而後足焉蓋彼放心於物外而此娛意於繁華二者各有適焉然其爲樂不得而兼也今夫所謂羅浮天台衡岳廬阜洞庭之廣三峡之險號爲東南奇偉秀絕者乃皆在乎下州小邑僻陋之邦此幽潛之士窮愁放逐之臣之所樂也若乃四方之所聚百貨之所交物盛人衆爲一都會而又能兼有山水之美以資富貴之娛者惟金陵錢塘然二邦皆僭竊於亂世及聖宋受命海內爲一金陵以後服見誅今其江山雖在而頽垣廢址荒煙野草過而覽者莫不爲之躊躇而悽愴獨錢塘自五代時知尊中國効臣順及其亡也頓首請命不煩干戈今其民幸富足安樂又其俗習工巧邑屋華麗蓋十餘萬家環以湖山左右映帶而閩商海賈風帆浪舶出入於江濤浩渺煙雲杳靄之間可謂盛矣而帥是邦者必



皆朝廷公卿大臣若天子之侍從又有四方遊士  
爲之賓客故喜占形勝治亭榭相與極遊覽之娛  
然其於所取有得於此者必有遺於彼獨所謂有  
美堂者山水登臨之美人物邑居之繁一寓目而  
盡得之蓋錢塘兼有天下之美而斯堂者又盡得  
錢塘之美焉宜乎公之甚愛而難忘也梅公清謹  
好學君子也視其所好可以得其人焉趙抃有美  
堂詩城在東南誠第一江湖只向坐中窺斯堂占  
勝名天下況有仁皇御製詩蘇軾有美堂暴雨詩  
遊人脚底一聲雷滿坐頑雲撥不開天外黑風吹  
海立浙東飛雨過江來十分潑艷金樽凸千杖猷  
鏗羯鼓催喚起謫仙泉灑面倒傾蛟室瀉瓊瑰又  
會客有美堂周邠長官與數僧同泛湖往北山湖  
中聞堂上歌笑聲以詩見寄因和二首藹藹君詩  
似嶺雲從來不許醉紅裙不知野屐穿山翠惟見  
輕橈破浪紋頗憶呼盧袁彥道難邀罵坐灌將軍  
晚風落日元無主不惜清涼與子分載酒無人過  
子雲掩關晝卧客書裙歌喉不共聽珠貫醉面何



因作纈紋僧侶且陪香火社詩壇欲斂鸛鵝軍憑  
君遍遶湖邊寺漲淥晴來已十分蔡襄重陽日有  
美堂南望詩越邑吳封繡錯分華堂繁吹半空聞  
山峰高下抽青笋江水東西卧白雲菊蕊芬芳初  
應節松林照耀欲迎曛州人不見歸時醉未擬風  
流待使君又和夜登有美堂詩忽聞乘月上層臺  
正值江湖夜色開雲屋萬重燈火合雪山千仞海  
潮來靜遊惟有詩情得獨笑應無俗語陪縱使羈  
懷多感慨若逢清致少徘徊沈邁和王巖夫有美  
堂會諸年契詩西寺題名墨尚新今爲賓主此堂  
人縱談更起揮青塵極醉何妨倒紫綸梁苑舊遊  
皆已往吳山高會正臨春欲知勝事常難得佳句  
先應動薦紳謝邁獨登有美堂詩龜趺雙峙日星  
懸讀罷憑闌心浩然繚繞峰巒浮野色參差樓閣  
起晴煙湖光淨照山間寺江浪遙連海外天安得  
翰林風月手一時摹寫入詩篇張先有美堂贈彥  
獻主人調寄山亭宴詞宴堂永晝喧簫鼓倚晴空  
畫欄紅柱玉瑩紫微人藹和氣春融日煦故宮池



館更樓臺約風月今宵何處湖水動鮮衣競拾翠  
湖邊路落花蕩漾怨空樹曉山靜數聲杜宇天意  
送芳菲正黯淡疎煙短雨新歡寧似舊歡長此  
會散幾時還聚試爲挹飛雲問還解相思否

謹按咸淳臨安志有美堂錢氏初建江亭於此當  
在吳山最高處左江右湖故爲登臨之勝又東坡  
有九日舟中望見有美堂上魯少卿飲處詩言舟  
中望見則必西湖舟中也舊志言堂在郡城內又  
可見古城介在吳山外矣淳祐六年府尹趙與簑  
獲古刻小碑於山巔太歲殿之側即仁宗御賜梅  
公詩則此堂故址當在吳山無疑西湖  
遊覽志載有美堂在鳳凰山者誤也

強至宅

咸淳臨安志至所居在吳山里

喬行簡宅

武林梵志吳山之陽有宋丞相喬行簡

故第竒石峭拔東望海門紹定間理宗幸其第書



見滄二字勒之崖石後捨宅爲寺名寶奎西湖遊  
覽志嘉靖中郡人茅瓚讀書寺中後及第因號見  
滄作亭覆石上

鄭炳宅

陳繼儒玉峯道人傳居吳山里

泉石山房

在吳山郝思道建

張以寧泉石山房記  
錢塘山水佳麗甲江

左其地爲勝國故都民物繁夥閭閻櫛比置圃無  
所而吳山屹立闔閭中兼城市山林之秀其佳麗  
又甲於錢塘士人郝思道爰築室焉崇石於庭灑  
泉及霑白雲時來皓月下浸玩而樂之仍效晉人  
枕石漱流之旨顏其藏脩游息之居曰泉石山房  
繪而詩之介其友盧檢閱大舉請予文予謂吳山  
固甲於錢塘然而世多秦酣富貴汗血聲利者鮮  
克領其趣而顯其樂惟尚志讀書弗味世腴寂寞



以為徒淡泊之與娛然後能有而樂之與人殊  
予聞思道先世居莒之沂水幼侍先大父御史行  
臺父正卿掾江浙行省因僑於是而居焉以鍾鼎  
之家膏粱之習顧能翛然於泉石之好茲固世之  
所尤罕矣予家武夷三山之曲縻祿京塵寢負  
歸約其愧思道何如也遂以大舉之請為記之

太虛樓

客越志

太守孫孟建在吳山絕巘望見百

里

有餘清軒

在吳山富氏宅見鐵崖集

楊維禎有餘清軒記錢塘

富子明氏有華堂一所在吳山凡圖史壺觴觚翰  
琴弈之具無不位置在列早作一開軒西子湖如  
大園鏡在橫几下四時朝暮風煙雨月之狀取之  
無窮不知九衢中奔走紅塵於十丈間者有權門  
勢閥也因自扁其軒曰有餘清予至錢塘必館其  
所集賢趙雍既為作古籀文書之而以記屬予予



曰舉世皆濁而子欲獨清其得乎子明曰某之清  
人人之所共得吾非奪彼以爲吾有也人清不足  
我清有餘彼何加於我我何損於彼哉子以其言  
爲知道雖然子明季世有爲之才也吾有進於子  
明者其在永嘉時常以經畧使命招諭山賊身試  
虎口人皆危之不數語開以逆順禍福即投戈歸  
順爲忌疾者損其功才與位未直也今嗣皇方有  
事於四方之征天下秉志之士無不奔走先後子  
明可攬轡而起矣以澄清之清灑掃區夏豈得事  
丈室之清以爲有餘乎子明謝曰此范孟博之清  
也於吾清  
乎何有

如此江山亭

七修類藁在吳山天聖觀上

天開圖畫閣

清暉亭

西湖遊覽志在承天靈應

觀上元末燬洪武二十三年道士嚴一清重建弘



治七年道士沈元理章德芳復相繼修之

吳訥宿天開圖

畫閣用楊廉夫韻詩承天觀裏開圖畫吳越山河  
一覽中半夜月明湖水白五更日出海門紅彩船  
春晚笙歌歇粉堞風高鼓角雄十二闌干都倚遍  
歸心飛過大江東張雨清暉亭詩萬瓦連雲人世  
窄一雞啼日海波紅欲窺倒景青冥外故着危亭  
紫翠中又吳山清暉亭與垣之仲舉聯句吳山秋  
色裏倚石望滄江日脚霞侵戶濤頭雪濺窗浪奔  
沙岸疊山夾海門雙有客謀新隱於茲感舊邦憑  
高乘險絕懷古點紛龐雜脊書連屋淋漓酒滿缸  
聯詩搜月窟擘阮瀉巖淙龜殼冠將墮龍文鼎可  
扛頗諧幽事熟未覺壯心降滿月孤金柱叢筠亂  
碧幢晴峰俄點點夕磬已樅樅歸路風塵表酣歌  
不用腔

宋太史局

西湖遊覽志在至德觀側宋有太史局



置神御殿以奉昊天上帝皇地祇太祖太宗高宗  
寧宗理宗之神

宋渾儀臺

西湖遊覽志在至德觀臺上有渾儀下

有土圭元至正燬渾儀無存行省丞相達識帖木

兒重建

看江亭

西湖遊覽志在皮場廟

真聖觀蕉花

萬曆錢塘縣志觀中蕉花盛開有道

士趙肖先居之一日有羽客來訪適趙他出題詩

蕉葉曰午夜君山玩月回西鄰小圃碧蓮開天風



香霧蒼花冷名籍因由問汝來又曰白雪紅鉛立  
聖胎美金花要十分開好同子往瀛洲看雲在青

霄鶴未來相傳以爲呂祖師寄託也

揭傒斯真聖觀蕉花訪仙

人題詩處詩誰道錢塘非昔日神宮仙館參差出  
天慶已開元妙門桃花猶結千年實仙人巖客題  
詩處道士著經曾姓褚舊人惟有馬先生年幾一  
百猶童孺永昌門外浙江潮趁潮暮暮復朝朝仙  
人一去不可招蓬萊彷彿三山遙鍊師歸領祠宮  
事淨洗塵心養真氣滿城彈指百年間惟有吳山  
千丈翠

竹山閣

成化杭州府志在竹園山宋臨安尹趙與

憲建閣其上平瞰西湖扁曰竹山閣理宗御書景



定三年魏安撫克愚徙其閣

寶成院牡丹

在寶蓮山

蘇軾寶成院賞牡丹詩春風小院却來時壁間惟見

使君詩應問使君何處去憑君說與春風知年年歲歲何窮已花似去年人老矣去年崔護若重來前度劉郎在千里

宋太廟

咸淳臨安志

在瑞石山左正殿七楹分十

三室太祖太宗真宗仁宗英宗神宗哲宗徽宗欽

宗高宗孝宗光宗寧宗咸淳添置理廟一主通爲

十四室又設配饗功臣位於橫街之南太祖趙普

曹彬太宗薛居正石熙載潘美真宗李沆王旦李



繼隆仁宗王曾呂夷簡曹瑋英宗韓琦曾公亮神  
宗富弼哲宗司馬光徽宗韓忠彥高宗呂頤浩趙  
鼎韓世忠張俊孝宗陳康伯史浩光宗葛泌寧宗  
趙如愚諸室之西奉僖順翼宣四祖神主每遇三  
年以孟冬祫饗即廟行禮次詣諸室恭行祀典

謹按西湖遊覽志稱宋太廟奉祀列宗獨欽宗缺而不祀今考咸淳志明載太祖至理宗凡十四室並未嘗缺祀欽宗况欽宗升祔自有月日見於宋史惟欽宗無配饗功臣故缺焉非缺欽宗主也田志之誤特為拈出

閱古堂

四朝間見錄韓侂冑所居在太廟側有桃



坡十二級夜燕則殿巖用紅燈數百出於桃坡之  
後以燭之錢塘志補宋爲寧壽觀之地韓侂冑鑿  
山爲園作爲流觴曲水故當時言官論韓侂冑有  
初造亭館震驚太廟之語蓋宋太廟正當泉下之  
山也

集慶堂  
西湖遊覽志紫陽菴宋嘉定間邑人胡傑  
居此建集慶堂

瑞石山樓  
西湖八社詩集祝時泰有瑞石山樓望

江詩



江湖一覽亭

萬曆杭州府志在七寶山三茅觀西

五臺宅

武林紀事

七寶山南渡時御史中丞辛丙

殿中侍御史常同監察御史魏石明橐周綱皆居

其上

櫻桃園

西湖遊覽志

在七寶山宋時採含桃以薦

太廟者

牟獻七兒應復同客飲櫻桃園摘新歸以遺親用其詩韻識所感詩聞汝相隨入翠

微歸時

晚色已淒迷櫻桃為喜筠籠重燕子休嫌

茅屋低

我老恐妨兒輩樂詩成欲繼古人題年來

自覺摧

頹甚送客何妨過虎溪尚記當年薦寢園

百官分

賜荷恩寬帶青絲籠空餘夢搔白頭人苦

不歡詩

老誇稱作崖蜜野翁驚看瀉銀

盤南山

見說紅千樹鳥雀兒童任入關



瑞慶院雙竹

杭州府志瑞慶院內有雙竹矯立斜

透枯樹冠其頂出森然並竦

借竹軒

錢塘縣志在寶嚴院秦少游曾宿軒中夢

天女以維摩像求贊

莫能名齋

萬曆杭州府志在寶蓮山浙西安撫司

幹辦公事廳

楊簡莫能名齋記四明楊簡為浙西撫屬淳熙十一年八月朔既領事而

宅僦隘陋外高中卑無晏息之所客至不可留不可以奉親偶得在官僧屋於寶蓮山之巔帥君雅禮士為更其居又使簡惟意規摹之乃創書室於高爽之地且曰是不可不命名簡思所以名之東望大江巨濤際天越山對揖袞袞如畫風帆飛鳥夕陽煙蕪朝暮晦明變態百出於是間名之乎如



此命名不惟遊逸顛迷沉溺外景要不可謂真識  
江山西望錢塘湖玉潔如鏡茂林奇峰樓觀輝日  
煙靄翠蒙摸寫不可於是間名之乎如此命名不  
惟遊逸顛迷沉溺外景要不可謂真識湖山反而  
即諸本真斂其放情落其外慕窮理密之幽微探  
元珠之杳冥不則事理兩融曲暢旁通百川會同  
歸宿於中又不則悠然無事惟意所之無所造爲  
樂亦熙熙於是間名之乎如此命名不惟遊逸顛  
迷沉溺外景俱不可爲實識本真周思天下古今  
名言無一可以稱此又豈惟簡莫能名正恐盡萬  
古明智絕識之士竭意悉慮窮日夜之力終莫能  
名於是勝曰莫能名齋然則終不可得而名之乎  
曰有能名之者是齋之南高松扶疎微風過之蕭  
然有聲是能名吾齋矣是齋之東洪濤駕風怒號  
翻空是能名吾齋矣是齋之西湖光翠迷忽飛鳥  
啼是能名吾齋矣是齋之北屢與其麓鱗比薨屋  
人物往復啾啾碌碌是能名吾齋矣有嘲曰旣曰  
莫能名又曰是能名何其立說之無常簡曰常淳



熙乙巳  
仲春記

溜水亭

陸游閱古泉記  
閱古泉在溜水亭之西

楊園

西湖遊覽志  
寶蓮山舊有寶蓮寺宋嘉定間

楊節使廢而為園

三仙閣

錢塘縣志  
內雕張三丰三身一立一卧一

坐明文皇訪三丰相傳隱於此林璐曰尚有文皇

御札存閣中閣近三茅觀

林璐三茅遺蹟詩仄徑千峰隨窈窕乘鸞何處

誦黃庭相傳漢鼎蛟龍紫遙辨唐鍾蝌蚪青天子玉函除御札仙人金字久書經江湖俯瞰都無恙臺上涵虛擁翠屏王修玉三仙閣詩青山崖夢連煙空茅君壇西石閣崇閣前江水雲濛濛閣邊古



樹霜前紅中有神仙號三丰變化靈異乘飛龍文  
皇求之不可逢今日宛然睹其容肖像有三貌則  
同或坐或卧顏如翁立者凜凜生氣濃一目若眇  
扶枯筇我來再拜思遺蹤斜陽忽暝萬壑鍾道人  
引我還中峰蓬萊欲往將安從顧豹文吳山尋三  
丰遺趾詩殿閣嵯峨縹渺間千秋祠廟駐名山此  
時應戴蒼龍去誰道曾騎白鹿還南極星辰瞻綵  
服九天風雨隱朱顏我來箕踞長松下倚劒狂歌  
悵莫攀

宋樞密院親兵營

咸淳臨安志在三茅觀前

宋內藏庫

咸淳臨安志在三茅山

寅賓亭

咸淳臨安志在三茅寧壽觀見日出

錢惟善過

寅賓亭詩寅賓亭上聽松聲夏木叅天綠染成千  
歲鶴歸城郭是四更雞動海波明每逢野客分雲



西湖志卷一  
坐慣引山童踏雪行載酒誰  
能忘勝槩賦詩我獨寄幽情

梅亭

四朝聞見錄陳讜題吳山三茅觀梅亭詩有

云竹密不知雲欲雨山高盡見水朝宗繼是無有

和者

煙霞閣

西湖遊覽志清平山舊有煙霞閣四壁畫

古賢像

宋侍衛步軍司

夢梁錄在鐵冶嶺西街有御書閣

湖山堂錦繡樓相公井

宋景獻太子府

夢梁錄在鐵冶嶺



楊維禎宅

七修類稿楊鐵崖初居杭鐵冶嶺

謹按李昇草閣集有題楊廉夫隱居詩云飲馬橋南水亭好是廉夫又有寓居在南山也

超然臺

錢塘縣志在雲居山頂

贊元亭

錢塘縣志在雲居山頂明胡宗憲建

宋恭聖楊太后宅

咸淳臨安志在漾沙坑

宋左右驂驥院

咸淳臨安志在漾沙坑以二十四

疋爲額日朝參則二院御者各以三馬南向立於

和寧門之外

宋諸軍糧料院

咸淳臨安志在漾沙坑以七官宅



爲之

七官宅

〔七修類稿〕在郭婆井

西溪路

西溪輦道

〔錢塘縣志〕歷方井法華秦亭幾十有八

里爲南宋車駕入禹航洞霄宮輦道

〔宋〕東觀西溪輦道和吳農

祥詩露臺吹角月黃昏七萃先驅出北門十里馬蹄春草路三山鶯語落花村仙宮玉牒來殊錫便殿鋪金謁至尊九瓊洞霄千帝座春風何處不消魂

秦亭

〔錢塘縣志〕相傳秦少游建亭其上故稱秦亭

山



鑿翠軒

西谿百咏序在西溪之東法華山下乃姚

江孫樹之隱居樹賦性簡僻隱此三十餘載不與

世人接惟閉戶著書

釋大善鑿翠軒詩翠竹林中鑿一方綠香深處隱山房雲

生石几花生筆月滿蘿軒書滿牀就澗煮茶便陸  
嗜因梅卧雪續林芳杜門不應人間事註易刪詩  
滋味  
長

方井亭

西谿梵隱志宋米芾題額歲久亭圯明里

人王槐重脩大司寇洪鐘補書方井桃源嶺五字

蒹葭里

西谿百咏序在西谿東北俗名河水高僧

名士蟬聯居此乃西谿最勝處

釋大善蒹葭里詩  
千頃蒹葭十里洲



溪居宜月更宜秋鷗鳬棲水高僧舍鶴鶴巢雲名  
士樓簷葡萄葉分飛鷺羽荻蘆花散釣魚舟黃橙紅  
柿白菱角不羨  
人間萬戶侯

泊菴

西谿百咏序在西谿秋雪菴南荻葦叢中乃

鄒孝直之莊鄰有王之聲孫元襄李蟠玉胡彥遠  
鱗次蘆洲構隱釣讀

淇上草堂

西谿百咏序在蒹葭里劉孝廉雪符別

業有蘿軒竹閣梅嶼荷池

釋大善淇上草堂詩溪山深處隱仙居徑轉雲

橋步碧虛日氣荷香熏几席煙光竹翠滴堦除蘿  
軒萬綠供新茗草閣羣青擁古書抱卷幽人隨月  
讀興來乘  
勝問樵漁



長慶堂

錢塘縣志 五代梁貞明間有隱士呂公建

菴名曰長慶

沈九如長慶堂記河渚峰巒隱現澗泉淒咽長松勁柏老梅疎竹人跡既

斷杳若萬里織簾斫篠足以養生拾橡緯蕭遂堪  
終歲吳祭酒偉業所謂真隱居者此其處也二十  
年前吳吏部本泰卜居遂終老焉而劉民部廷獻  
胡山人介皆有別業在河渚民部未第時江高士  
浩贈之詩曰得失如今易地觀吾將斗酒賀劉安  
碧翁能解幽人意放爾歸來理釣竿又曰當時懶  
上計借車只恐天台舊路迷秋晚歸來黃葉滿半  
規寒月在花溪胡山人介有曹侍郎溶外補雲中  
過旅堂話別調寄賀新郎詞云落日催行李借籌  
邊北門鎖鑰關山牙檠絕塞長城雄劒動一變旌  
旗壁壘憶疇昔風流有幾長是漢廷推魏尚笑從  
容尊俎應難擬橫梁罷詩成矣燕山猶記浮清蟻  
下西臺故人徵逐豸袍斜倚刻燭分題驚坐客錯  
落驪珠盈几那又隔雁門千里落日飛鳥相憶處



算男兒不爲封侯悔君管樂吾園綺則諸君甘藜藿變名姓隱於川巖莫知其處蓋不止長慶自然流美於河渚矣

金魚井亭

西溪梵隱志亭旁有金魚井梁材柱礎

跨輦道而翼然

萬玉軒

西湖遊覽志在石人嶺後時思薦福寺寺

側有萬玉軒北近西溪最多古梅

湧山閣

錢塘縣志在西溪之東石人嶺下藐山主

人聽泉處

釋大善湧山閣詩煙霞深鎖世情違春鳥啼門晝掩扉翠岫湧雲林外起碧溪

漱雪閣前飛瀑花帶霰迷幽逕噴霧含煙落翠微仙客臨流高卧聽夢隨清響入元微

顧彩文湧山



閣遺址觀落梅詩何處梅爭發西溪又夕暉月來  
初有影風定不成飛水鳥閑窺戶山蜂却坐衣玉  
樓還汎汎瑤圃尚霏霏繁蕊看初落高枝見亦稀  
吹簫留杖履清磬冷巖扉草閣殘僧舍溪橋惜釣  
磯飄零那易負  
惆悵未能歸

洪鉉宅

錢塘志補鉉性恬淡不樂仕進歸隱西溪

以圖史消歲月或栽花蒔竹借以自娛暇時與農  
夫鄰老課晴問雨究桑麻之事

章神術

西谿梵隱志在馬池南街相傳宋咸淳間

有章姓者勇敢有力聞賊兵過溪時方舂米即頭  
戴石臼手持白挺大呼而出兵皆散去溪民無擾



人皆稱得勝章相公今祀為土穀神

留下

成化杭州府志自西堰橋至鎮十八里地形

爽塏宋南渡將築行宮於此後定於鳳凰山此地

獨留故曰留下

李式玉留下鎮有懷宋故宮詩五馬南浮到海隅澗漚曾比卜王都

鳳凰山下千門闢鸛鵲臺前萬國趨明月夜懸珠樹冷黃昏秋影石幢孤祇今惟有空山在春殿無

人鳥自呼

仰家園

柏家園

方家園

西谿梵隱志在九沙

吳越國西教場故地

董宗源仰園詩小橋傍岸綠成溪高閣輕陰春晝齊鳥語

綿蠻連上下魚梁深淺合東西青分楊柳風中舞紅壓桃花雨後低惆悵當年多勝槩迴廊猶見舊



碑題冥本泰柏家園看梅詩浦漱沿洄沙路迂石  
田梅老幾千株朦朧梵苑開香界零亂春宮粲雪  
膚芳沁冷泉山鹿飲夢迷殘月野禽呼  
誅茅小築何年遂畫作幽居梅里圖

宋高宗禁酒牌

萬曆錢塘縣志西溪留下西南三

里有宋人禁酒牌即高宗入山村酒肆喜其供奉  
精潔御書界牌以賜曰不爲酒稅處是也

陶家廂

咸淳臨安志在禁酒牌後理宗朝有陶處

士隱此水竹田桑夫耕婦織有栗里之風皆山川  
幽寂處

張氏園

西谿百咏序在西溪之南碧澗繞門白雲



入室竹樓花榭月色泉聲皆有留人之意

孫莊

西谿百咏序孫武書莊在張園之左有小閣

名藏雲

翁氏書閣

錢塘縣志西溪之東安樂山下永興寺

前有永興湖一泓澄碧紅蓮綠柳映水臨堤崇禎

初翁氏伯仲構書閣於此

西溪草堂

西谿梵隱志祭酒馮夢禎別業

李衷純馮開之

太史築室西溪予將卜鄰賦寄詩聞君卜築虎溪  
邊萬壑千峰直插天高卧白雲秋嶂裏歸來黃葉  
寺門前鹿蕉夢破人間世龍樹禪栖物外  
緣不識遺民甘世棄肯容蓮社共周旋



雲谷山房

錢塘縣志在青芝橋最深處素心孫道

人構築為藏修之所

河渚草堂

張卿子孤山慵隱卷序河渚草堂鄒孝

直之別業

宜園

錢塘縣志在柏家園舊為司勳虞淳熙別墅

後屬鄭司彥

石廟松

西谿百咏序在西穆塢內有神為五代石

晉子孫遂稱石廟祠前有古松大可十圍想同時

物也

僧大善石廟松詩千歲孤松古社前虬枝針葉散蒼煙龍蟠待雨潛雲谷鶴舞凌雲駕洞



仙雙澗鳴濤歌樂業九沙拱秀祝豐年  
四時義社分清籟樹下同吟秋水篇

別天居

西谿百咏序在安樂山下永興湖上蘭陵

陸元見隱此舊有古梅三百蔽籬落間近徒徑就  
梅移籬放樹引流遶閣種石依泉爲茲山選勝處  
永興山亭  
錢塘縣志山特秀挺綠蘿開徑高隱者  
居焉

金四將軍宅

西谿梵隱志在谿市北宋建炎間金

四將軍從張伯英戰死其妻歸舊廬築橋資冥福

橋下垂柳獨盛



放山臺

西谿梵隱志在永興西爲當湖孝廉馮茂

遠僑居舊有大士閣三面皆山當窗豁如乃穿木立屋顏曰放山快此日放山到眼也

楊圩

西谿百咏序在溪北宋之功臣楊統制世居

錢塘兄弟友愛退歸林下各置一圩之產因名楊圩

百丈里

西谿梵隱志宋開慶間董氏三荆宦成遞

捐貲以通江道今石橋百丈之址猶存

周陸隱居

西谿梵隱志隱者周士民乃茂叔之裔



有山園在耕南塢堂名草窗又四明象山陸氏子

乃子靜之裔家於卧象山下軒曰寓目又築望雲

臺今惟陸家橋存焉

董嗣果周陸隱居詩漁樵耕牧自成邨就屋編籬古意存

出塢野雲多曲折過橋溪水半清渾一逢白壁書香社幾見朱闌障墓門地利最饒人事簡山家還

有別乾坤

橫山草堂

西谿梵隱志在六松林畔為江氏別業

有醉山閣擁書樓竹浪居藏山舫有亭有橋有田

有石

江元祚橫山草堂記客詰橫山樵子曰達人安於容膝子居室之外有澹圃竹樹池臺亦

云侈矣又况結境幽奧城市之中儼然邱壑能閉門即深山也何又營草堂得無取境過奢乎山樵



曰噫余豈貪於取境者哉蓋欲以可進可退之身  
寄之山林城市者也故兩營焉客曰子言是矣第  
草堂奚加於澹圃每見子過澹圃如寄入草堂如  
歸何哉山樵曰澹圃之不得匹草堂猶培塿之不  
可當衡華也請爲子言之草堂結於黃山黃山舊  
名橫山土音呼橫爲黃遂相傳爲黃山離吾家五  
十里許其途有二一由湧金門以平湖長江爲徑  
歷淨慈而梵村入朱橋一由錢塘門以古梅脩竹  
爲徑歷東嶽而西溪越大嶺二徑俱勝一蕭曠一  
幽邃入山宜幽予多取道西溪焉西溪抵吾菴路  
過半矣延途茂林森夾碧澗紆流村落茅亭不數  
里一憩且轉折煙迷如入武夷九曲非止行山陰  
道令人應接不暇也近菴二百餘武更有六松大  
十數圍高可百尺古幹龍拏蒼姿翠滴每箕踞其  
下清冷之氣逼人不能爲橫山翹楚即三竺九里  
亦避下風惜局於社垣之間殊未得所耳然峭峙  
路傍與佛慧古樹法華老梅均爲吾往來快觀若  
千百年來預爲山居闢此佳徑也由是漸入深壑



復遠以茂林脩竹前則江湖梅松爲徑後則巖石  
 泉瀑爲鄰誠爲造物所鍾必厚以天福而後樂此  
 子薄福人願依棲焉敢自期耶子言歸澹圃如寄  
 子真知我者矣李日華橫山草堂記武林山水秀  
 甲天下人所競趨在明聖一湖而韻者乃走西溪  
 得其精深窈窕盤紆演衍之致至於竹翠萬屯梅  
 香十里耳目清映口鼻芬霏似非塵境矣然朝往  
 夕迴春濃夏寂有時日之玩無彌歲之歡猶淺之  
 乎其爲遭者昔眞實馮先生溯溪抵留下曰此中  
 大有佳處因策杖運肘期規百弓地爲香山西林  
 之續不意竟爲湖面所妮僅築快雪於孤山而歸  
 其蛻於此可歎也余友江邦玉代襲組圭夙耽綰  
 素一日擔書負笠從留下孤進又廿里達橫山之  
 趾顧而樂之歸罄篋笥歲月規置遂有卓茅之地  
 若干畝又以餘暇秉鋤旁近劬山肝之腴引海眼  
 之溜磳确者堵以佐培塿窈窕者導以輪涓瀝絕  
 則布圯高則沓級平則空以延月翳則剪以逗雲  
 凡剔舊壤十之四得新泉七之五而後垣之藩之



屋之堂之樓之閣之亭之榭之溜之庾之柵之構  
結之事因材於山呼匠於谷設繩於心司契於目  
不筮不兆不驗不祈不謀於室不告於常所往來  
而山居成戊辰春余適在武林遂偕懶宜主人秦  
心卿邦玉兒亨各御軟輿遊馬時西溪梅已半殘  
樹頭零玉陌上墜鈿猶堪拾也比日春陰醞雨未  
就放晴無期氣候殊美輿所經俱在翠光竹樹淙  
流灑淅間有時驀然震地則山民治楮之碓涎涎  
曳行則野樵荷薪之聲山靜日長真同太古從是  
抵山居泉益壯爲蓄翠泉竹柏影涵浸如軟琉璃  
也橋其上曰漱雪白波嚙石齒狀色與聲也從橋  
漸進不拾級而趾益高遂達平曠織竹緯荆曰鹿  
藩藩南列垣門曰扁岫是居不徒遠障週遮而山  
之玉骨倩姿巉然彌布內壑扁之者表內美也又  
南爲竹浪居簣簣篠蕩之屬森映踰畝輕颺拂之  
簌宕成漪得竹最親處也繇左五折爲空蘊菴以  
奉大士左曰香夢窩主人燕息所也右曰掛屐寮  
以奉來遊之賓後當西嶺松栝蔦蘿糾纏蔽翳僅



露峯杪類窺牆之髻曰雲髻軒庭北曰巢松閣左  
 曰雲肆轉南正當午峰曰悠然見南山稍西又闢  
 一境度澗爲修廊廊之端架虛閣小闌可憑衡木  
 可坐泉落珊珊可俯窺可側聽曰留櫺其廊屈曲  
 曰却月廊有溪如沼汴可濯曰浴硯溪溪左右奇  
 石纍纍可拊可就曰泚筆壘吟咏揮運選勝遊幽  
 必此其最也又緣溪而進啓一戶曰花源雲構內  
 有傑閣三楹遠近諸岑窮詭極變頽然領之曰醉  
 山樓樓下曰偕隱又北曰藏山舫山蹠四距屋其  
 中軒檻洞明兩崖對峙可觴可琴舟以任載遊移  
 而泊然置之壑中根深寧極道之奧也出樓南一  
 小峯亭之曰霞外放目寥廓龕赭擊雪之濤滄溟  
 沃日之浸萬畝億疇千蹊百綫俱挾翠嵐紅景與  
 雙瞳相值觀止矣余來宿掛屐寮三昔又間道走  
 一丈巖奔雷鬪霆之下班坐石上縱談劇謔勺泉  
 飲之爽同沆瀣歸而執筆敘述宜有秀韻而竟不  
 能也廬山西林必香山自記始無遺情余徒歎邦  
 玉膽智神韻與福緣之厚爲真實先生所遜而已



不足增草  
堂之槩也

借竹居

西谿梵隱志在龍歸塢斤竹澗山前沈氏

建

吳越將臺

錢塘縣志在大蘇林錢氏納土後改爲

趙山寺

古法華亭

西谿梵隱志在花塢口輦道上唐肆也

南北設板橋以憇行旅橫山六松長江元祚書額

自然室

西谿梵隱志在荆山灣內孤峭峰間一隱

者結茅顏曰自然室



謹按湖上古蹟無定址可考者僅從前賢記載題咏中畧識其名然亦不可沒也今附錄於左

唐處士宅 方干有贈錢塘湖上唐處士詩

西齋 許渾有遊錢塘青山李隱居西齋詩

映發亭 楊蟠西湖百咏有映發亭詩

西水亭 楊蟠西湖百咏有西水亭詩

清隱閣 楊蟠西湖百咏有清隱閣詩

楊蟠宅 泊宅編楊蟠字公濟其宅在錢塘湖上

飲綠亭 范成大飲綠亭詩引李翬知縣作亭西湖

上予用東坡語名之曰飲綠遂爲勝槩

范成大飲綠亭詩正



葦蓮巢喚客遊蘆鞭席帽爲君留未論吹水堪添  
酒且要移牀學枕流乍霽却陰梅釀雨暫暄還冷  
麥催秋石湖也似西湖  
好煩向蒼煙問白鷗

尤袤別圃

萬柳溪邊舊話先莊定公築圃臨安之

西湖度宗嘗幸其堂御筆題楹間曰五世三登宰  
輔弈朝累掌絲綸

半湖樓

朱繼芳半湖樓詩四明仙客此樓居畢竟

西湖壓鑑湖

葛天民宅

癸辛雜識天民初爲僧後返初服居西

湖上時所交遊皆名勝士



孫壁山房

佩楚軒客談南宋金應桂字一之雅有

標度能歐書晚居西湖南山中築孫壁山房左弦

右壺中設圖史古器客至摩娑諦玩清譚瀟灑每

入城幅巾氅衣望之若神仙然

李彭老寄題孫壁山房調寄高陽臺

詞石笋埋雲風篁嘯晚翠微高處幽居縹簡雲籤人間一點塵無綠深門戶啼鵲外看堆牀寶晉圖書儘蕭閒浴硯臨池滴露研朱舊時曾寫桃花扇弄霏香秀筆春滿西湖松菊依然柴桑自愛吾廬冰壺玉塵風流在更秋蘭香染衣裾照窗明小字珠璣重見歐虞

松聲樓

錢惟善松聲樓詩南山多鉅松空翠拂靈

石



余園 明殿撰余煌別墅

陳園 明掌科陳爾翼別墅

池上軒 明孝廉黃元辰別墅

芙蓉園 明富春周中翰園

潁谷草堂 明陳遂初別墅邵經邦陳遂初潁谷草堂詩潁谷吾曾入堂開

湖水陰此時瞻桂席何處覓瑤琴解劍蛟龍吼迴車霧雨深寶花天靳惜滄海沒瑯琳

湖邊草堂 明侍御童漢臣別墅萬表童侍御湖邊草堂詩背郭紅塵

隔臨湖畫舫環曉風清吹發暮雨醉歌還喧寂心因悟迂遲地自閒寧知淮上客同此卧花間

小桃王氏別館 見田藝蘅詩田藝蘅題小桃王氏別館詩柳外朱樓綸



彩霞阿誰湖上浣春紗  
留人燕子初命子映面桃花  
恰始花輕薄未應來鄴下  
呢喃多是憶王家東風頻駐青驄騎  
無那橋西酒旆斜

陳侍御西湖莊

見石簣山房稿

陶望齡陳侍御西湖莊詩名塲羨爾

一身收墨詔新銜  
拜醉侯艇子舊裝蓮  
葉樣吳兒殊有串珠喉  
輕輿軟逕花間馭  
晚翠朝煙水上樓  
我有清狂公記取  
十旬三度淨慈遊

梅花嶼

見陳邦瞻諸詩

陳邦瞻梅花嶼詩梅花枝幾行孤嶼帶橫塘雪在難

分色風來始悟香  
橫斜依夕照清絕問修篁  
此夜看明月佳人不可忘  
鄭以偉梅花嶼詩誰家園林  
秋一段煙波割取西湖半  
桑條覆窗黃欲交竹葉  
凌軒綠不斷夾嶺古梅青  
可憐鐵枝半枯孤山前  
客來未是花開日尚照  
師雄一覺眠田藝蘅徐元  
舉張維昇維光邀飲梅花嶼詩  
梅花點點落漁磯



那忍桃花一片飛白髮有情容白社紅妝何事笑  
紅衣湖濱喚酒鶯初出堤上扶筇草漸肥百六好  
春逢上已祇宜茗芋答晴暉

鷄棲園

見溫純詩

溫純遊鷄棲園詩高榭倚危岑登臨愜素心峰疑移海市人似

到雲林花氣卷簾入歌聲雜鳥吟相看春意足底用出郊尋

朗閣

吳之鯨別業

吳之鯨湖上朗閣詩楓赤霜元橘正黃遠峰點點映滄浪如拳

朗閣勞人問絳帳何如馬季常

懶園

海寧葛徵奇別業

李因懶園贈別詩竹逕藤菴古樹幽柳條拂地繫歸

舟離情莫向愁人說腸斷簫聲鸚鵡洲

吳氏湖館

吳今生別業張卿子湖上篇有燈夕雨



中飲吳今生湖館聽歌詩

吳園 商山吳去塵別業張卿子湖上篇有吳去塵

雨堂對菊詩

吳氏草堂

吳羽南別業

張遂辰過吳羽南新築草堂詩荒略南鄰意開林徑

未分藤花依樹上野水近橋聞自起烹春雨誰來坐夕曛情高直稀事不乞草堂文

張氏湖館

張遂辰別業遂辰又有東莊

張遂辰初入湖館詩

半屋出芭蕉春深晝寂寥池翻雙翠鴨門接小紅橋柳短遮來淺村明望不遙只愁通畫舫遊女過吹簫又春夕同姚江呂白榆嘉禾陳則梁魏子一吳門薄子珏樓水卓珂月連飲湖館詩何來車馬水西東每夕湖頭讌賞同深院花寒春未半綺筵歌闋月方中詞章轉益交情重壺矢能將樂事終



更喜披襟多醉後一時風詠盡才雄又晚坐西樓  
詩殘雪初消新月生樓頭日暮江南晴不知春水  
添多少幾處煙中畫槳聲又西樓蚤秋憶隔湖諸  
子詩澤國恒早涼流火忽西匿晚坐向空堂木葉  
何策策熠燿定不飛蟋蟀乍鳴壁涼簟漸侵肌微  
鐙耿中夕嗟我孤卧人眷然抱憂疾無事長委懷  
詎必平生戚况此秋風初高樓水邊出河落未渠  
央相望方脉脉又新晴過東莊詩不到東莊久門  
前繫野航柳花吹  
麥隴別是一風光

盟鷗墅

陳孟文別業

凌登名集陳孟文盟鷗墅詩  
蘇隄五月綠成陰綺閣連雲

草木深十里平湖當几席幾番疎雨過園林楸枰  
遮莫同長夏玉瀝何方共淺斟遙望龍舟出花港  
一聲鼉鼓  
起幽禽



西湖志卷之十八



西湖志卷之十九

名賢一

山川間氣篤生偉人而人傑地靈則山川復因人而增重過槃澗而懷碩人瞻淇澳而思君子即其地可想見其人焉西湖名流輩出或選勝而來或抱奇而處山高水長有令人流連嚮往而不能置者志名賢

漢

陸瑋

西湖遊覽志瑋字文該隱居學易圖淮南王



劉安及九師像以祀之名九師堂萬曆錢塘縣志  
文該後漢時納祿隱居於靈隱山

宋

謝靈運

南史本傳靈運安西將軍弈之孫少好學

博覽羣書文章之美爲江左第一襲封康樂公出  
爲永嘉太守郡有各山水素所愛好遂肆意遊遨  
所至輒爲詩詠以致其意在郡一周稱疾去職移  
籍會稽有終焉之志與族弟惠連東海何長瑜潁  
川荀雍泰山羊璿之以文章賞會共爲山澤之遊



時人謂之四友西湖遊覽志靈隱山畔有夢謝亭  
晉杜明禪師爲謝靈運建靈運父舉之憂不能畜  
乃寄養於杜明杜明夜夢東南有賢人相訪翌日  
靈運至遂建夢謝亭一名客兒亭

梁

朱世卿

錢塘縣志世卿鹽官人有別業在武林山

榜云隱士鹽官朱世卿墅

唐

駱賓王

唐書本傳賓王義烏人七歲能賦詩除臨



海丞鞅鞅不得志棄官去徐敬業舉義署爲府屬  
爲敬業傳檄天下斥武后罪狀后讀至一杯之土  
未乾六尺之孤安在矍然曰誰爲之或以賓王對  
后曰爲宰相安得失此人敬業敗賓王不知所之  
〔本事詩〕當敬業之敗與賓王俱追捕之不獲敬業  
爲衡山僧賓王乃落髮遍遊名山至靈隱以周歲  
卒

袁仁敬

〔咸淳臨安志〕

唐開元中帝自擇諸司長官

以袁仁敬刺杭州詔諸王御史祖道洛濱賜詩親



書以寵其行仁敬治郡之暇嘗種九里松有天台  
教寺自唐開山有袁公松門跨路如一字然稱一  
字門又有袁君亭後人因思慕袁君建

李源 西湖遊覽志源京洛人父愷死祿山之難源  
悲憤不仕不娶居惠林寺三十年

李泌 舊唐書本傳泌字長源魏八柱國弼六世孫  
徙居京兆出爲杭州刺史拜中書侍郎平章事卒  
贈太子太傅 西湖遊覽志自江湖避錢唐而擊西  
陵沮洳斥鹵化爲平原今之城市聚落皆江流故



地也其水苦惡惟負山鑿井乃得甘泉而所及不  
廣唐宰相李泌當興元時守杭州始作六井引湖  
水以濟民民以爲利

盧元輔

咸淳臨安志元輔自河南縣令除杭州刺

史於武林山作見山亭其所撰胥山祠銘文采煥  
發至今猶傳誦之

謹按元輔之文見於唐文粹中今北山神尼塔下  
石壁上尚有元輔遊天竺寺七律一首大書深刻  
至今尚完好詩句雋永書法遒勁錄碑碣中可補唐詩之遺

相里君

白居易冷泉亭記先是領郡者有相里君



造虛白亭韓僕射臯作候仙亭裴庶子棠棣作觀  
風亭

元萼

咸淳臨安志

萼爲右司郎中作冷泉亭

嚴休復

萬曆杭州府志

休復於唐憲宗時知杭州

唐語林云白樂天除杭州替嚴員外休復休復有  
時名公喜爲之代樂天清輝樓詩序云嚴十八郎  
中在郡日改制東南樓名曰清輝未立標榜名歸  
郎曹喜代之意於此可見是其稱職可徵矣

白居易

唐書本傳

居易字樂天爲杭州刺史始築



隄捍錢唐湖鍾洩其水溉田千頃民賴其汲萬曆  
杭州府志居易長慶中爲中書舍人進忠不見聽  
乃勾外遷爲杭州刺史其築隄捍湖并復濬六井  
諸惠蹟在杭及罷杭俸多留官庫繼守者公用不  
足則假而復填如是者五十餘年蓋廉靜固其雅  
操云

崔彥曾

咸化杭州府志彥曾咸通二年爲刺史開

沙河塘

陸羽

舊錢塘縣志

羽字鴻漸竟陵人以筮得漸之



蹇曰鴻漸於陸其羽可用爲儀吉因以爲名氏上  
元初隱茗上自稱桑苧翁時人方之接輿嘗寓靈  
隱山作二寺記曾鑱於石惜乎不傳

五代

錢鏐

五代史吳越世家鏐字具美臨安人唐天復

二年封越王天祐元年封吳王梁太祖即位封吳  
越王卒謚武肅吳越備史龍德二年冊封爲吳越  
國王咸淳臨安志景福二年七月發民夫二十萬  
及十三都軍士築杭州羅城周七十里宋史河渠



志錢氏有國始置撩湖兵士千人專一開濬

曹杲

咸淳臨安志

杲真定人仕後唐爲金華令時

郡兵叛以計平之吳越王嘉其功擢守婺國初錢氏入朝委以國事杲即城隅浚三池曰湧金旣歿民德之爲立祠池上

羅隱

靈隱寺舊志

隱從事湘南歷淮潤皆不得志

乃歸謁吳越王錢鏐以過夏口詩獻云一箇禰衡留不得思量黃祖謾英雄鏐覽之大笑表爲錢塘令作靈隱詩朱溫篡唐隱說鏐舉兵伐梁曰雖無



成功猶可退保杭越奈何交臂事賊爲千古羞殆  
有魯仲連之風咸淳臨安志羅隱爲錢塘令手植  
海棠於縣署王元之有詩紀之曰江東遺跡在錢  
塘手植庭花滿縣香若使當年居顯位海棠今日  
是甘棠觀此詩隱之風流未泯可知矣

鮑君福

咸淳臨安志君福字慶臣爲吳越錢氏相

以功賜采田於玉泉之側今所謂鮑家田是也君  
福性淳厚有膽氣從軍以驍果稱能馬上輪雙劍  
入陣望之如飛電晉天福中卒謚曰忠壯



何溥

咸淳臨安志溥越州人識雲氣善地理爲南

唐僕射大夫國亡溥掛冠隱芙蓉山隱跡禪門不  
談僧話每誦道德經必曰真聖人也孔子豈欺我  
哉今石屋嶺有祠

宋

錢𨮒

武林紀事𨮒字岳父吳越王後以孝義知名

居杭州錢塘門外九里松之間建傑閣藏書甚富  
東坡謗之曰錢氏書藏仕至直秘閣知荆南府其  
兄穆文有寄仲弟岳父詩曰東方千騎擁朱輪衣



錦歸逢故國春莫向西湖戀風月鵲原知有望歸人

潘閬

四朝聞見錄閬字逍遙太谷人居錢塘太學

東巷後人稱潘閬巷閬爲宋秦王府記室叅軍落魄不檢與秦王繼恩善繼恩得罪下獄捕閬甚急閬遂髡爲僧而逃後以曹彬疏奏太宗怒解召閬授四門助教自以老懶不任朝謁封還敕命未幾議者謂閬終是秦黨多怨望編置信上閬至信上酌道旁聖泉詩猶稱秦王舊銜也郡齋讀書志崇



寧間武夷黃靜仕杭得閬詩十首刻之石爲之跋  
云放懷湖山隨意吟咏詞翰飄然非俗手所可仰  
潘閬謫仙人也有逍遙集

胡則

咸淳臨安志則字子正少倜儻負氣吳越間

不設貢舉儒風爲息則獨蒐經史屬文詞及歸宋  
遂登端拱二年第踐更中外四十七年初爲僉書  
貝州節度觀察判官公事命行河北路省士民冗  
役幾十萬數守潯州虎爲患禱城隍神翌朝得死  
虎於廟中性孝丁母憂廬墓有草木之祥武林紀



事子正再牧杭州得請加兵部侍郎致政因退居  
西湖乘游舫泛清波深尊雅絃左子右孫與親朋  
笑歌於歲時之間浩如也朝廷命長子楷通守錢  
塘以就養之寶元二年終於私第

陳堯佐 四朝詩選堯佐字希元號知餘子閬州人  
端拱進士累擢知制誥歷同中書門下平章事以  
太子太師致仕卒謚文惠西湖遊覽志涵碧橋宋  
轉運使陳堯佐重建碑紀其事

林逋 武林紀事逋字君復世爲錢塘人祖克己仕



錢氏爲通儒院學士逋少孤刻志爲學景德中放  
遊江淮及歸結廬西湖之孤山真宗聞其名屢賜  
粟帛詔州縣常存慰之善行草書喜爲詩其語孤  
峭澄澹而未嘗存稿或問之逋曰吾終志山林不  
欲取名於時况遺後世乎不娶無子教兄子宥登  
進士第咸淳臨安志林逋先生雖在隱逸爲一時  
名公推重范仲淹贈詩曰巢由不願仕堯舜豈遺  
人又云風俗因君厚文章到老醇梅堯臣序其詩  
謂其談道則孔孟語文則韓李趣向博遠直寄適



於詩耳歐陽修謂自逋之卒湖山寂寥無有繼者  
其推重如此四朝詩選逋有詩三卷西湖紀逸一  
卷萬曆杭州府志逋隱居西湖杭守王隨每與唱  
和訪其廬出俸錢以新之李及薛映每就見清談  
終日逋嘗畜兩鶴縱之則干霄久焉復入樊中時  
泛小艇遊西湖諸寺客至則一童應門延坐開籠  
縱鶴必棹船而歸蓋以鶴飛爲候其臨終詩云湖  
上青山對結廬墳前脩竹亦蕭疎茂陵他日求遺  
稿猶喜曾無封禪書卒年六十一逋嘗稱李諮謂



其有公輔之器逋卒而謫守杭爲服總與其門人  
哭而葬之舍側刻臨終一絕納壙中仁宗賜謚和  
靖先生仍賜米五十石帛五十匹陸游書和靖帖  
祥符天禧間士之風節文學名天下者陝部魏仲  
先錢塘林君復二人又皆工於詩方是時天子修  
封禪告太平有二人在天下麟鳳芝草不足言矣  
君復書法又自高勝絕人予每見之方病不藥而  
愈方饑不食而飽忽得覩上竺廣慧法師所藏二  
帖不覺起敬立法師能捐一石刻之山中使吾輩



皆得墨本以刮目散懷亦一奇事也

王濟

成化杭州府志濟字巨川性剛直無所畏避

景德四年杭州守薛映滿議擇代者馮拯曰餘杭  
比諸道易治上曰方面之寄古諸侯也常時無事  
則爲易治吳人輕巧苟預備非常安可謂之易也  
因閱班簿指孫僅王濟謂王旦曰二人孰優旦曰  
濟有吏幹可副是選上面加慰諭仍誠以朝廷闕  
失許密疏上言吳越俗尚華靡濟矯以素質用瓦  
缶木杓爲犒設之具吏民竊哂之濟不爲變郡城



西有錢塘湖可溉田千餘頃歲久湮塞命工濬治  
增置斗門以防潰溢之患仍以白公舊記刻石湖  
側民頗利之

李及

咸淳臨安志及字知幾

宋史作  
幼幾

乾興元年以

樞密直學士知杭州於時內侍江德元用事其弟  
德明使過杭及待之薄僚佐驚曰江使者兄弟榮  
枯大臣如反掌耳公不加禮待雖不期福獨不畏  
爲禍乎及曰待之如是足矣旣而德明謂僚佐曰  
李公春秋高何不求閒郡自處乃居杭繁劇地僚



佐走語之及笑曰及老矣誠願得閒郡自逸旣而  
德明亦不能傷也時人重其操守及資質清介治  
尚簡嚴喜慰薦下吏而樂道人善在杭惡其風俗  
輕靡乃不事遊宴一日微雪出郊衆謂當命賓朋  
爲高會乃獨造林逋清談至暮而歸任中未嘗市  
物滿去惟白樂天集一部旣而悔曰惟此愧心耳  
徐復 成化杭州府志復字希顏一字復之莆田人  
久游吳因家杭州康定中元昊叛詔求文武材可  
用者宋綬林瑀以復薦召見問天時人事復獻所



爲邊防策太乙主客立成曆洪範論帝善其言欲  
官之固辭與林瑀同修周易會元紀歲餘歸禮以  
束帛賜號冲晦處士年幾八十沈文通守杭勝其  
居曰高士坊北窗炙輠錢塘兩處士和靖居孤山  
冲晦居萬松嶺並稱二處士

鄭戩

成化杭州府志戩字天休蘇州人慶曆元年

以資政殿學士知杭州西湖溉民田數百頃歲久  
不治葑泥湮塞及爲豪族僧寺規占戩發屬縣丁  
數萬盡闢之民賴其利後有詔歲常修導



梅摯

宋史本傳摯字公儀成都新繁人性淳靜不

爲矯厲之行平居未嘗問生業喜爲詩多警句有  
奏議四十餘篇西湖遊覽志嘉祐二年梅公儀以  
龍圖閣直學士出守杭州仁宗賜之詩曰地有湖  
山美東南第一州剖符宣政化持橐輟才流暫出  
論思列遙分旰食憂循良勤撫俗來暮聽歡謳摯  
旣履任名其堂曰有美歐陽永叔爲之記蔡君謨  
爲之書士大夫題詠者甚多

梅詢

成化杭州府志詢字堯臣爲仁和令嘗作武



林山十詠詩刻石於冷泉亭上

范仲淹

宋史本傳仲淹字希文其先邠州後徙江

南遂爲蘇州吳縣人舉進士第叅知政事以天下  
爲己任日夜謀慮興致太平自朋黨之論浸聞自  
請罷政事乃以爲資政殿學士陝西四路宣撫使  
知邠州以疾請鄧州尋徙杭州再遷戶部侍郎徙  
青州請潁州未至而卒贈兵部尚書謚文正仲淹  
內剛外和爲政尚寬厚所至有恩鶴林玉露宋皇  
祐間吳中大饑范文正公領浙西乃縱民競渡與



僚佐日出燕西湖諭諸寺以歲荒價廉可大興土木於是諸作鼎新又新倉廩吏舍日役千夫監司乃劾奏公不恤荒政游宴興作蕩財傷民公乃條奏所以如此正欲發有餘之財以惠貧者使工技傭力之人皆得仰食於公私不至轉徙溝壑荒政之施莫此爲大是歲惟杭饑而不害靈隱寺志僧遵式建日觀菴范文正公爲之記靈隱至今相傳有文正之卧榻

沈邁

武林紀事

邁字文通嘉祐中以禮部尚書知



西湖志卷之六  
三  
杭州令行禁止人有貧無以葬孤不能嫁者悉用  
公府錢爲葬嫁者數百人良家賣入娼優者悉以  
錢贖歸其父母接遇士大夫以禮各得其懽心每  
晨起視事及午則與賓客往還從容雅談士大夫  
無不稱其能嘗作南井引西湖水入城以便民汲  
人呼爲沈公井

祖無擇

四朝詩選

無擇字擇之上蔡人進士高第

歷光祿卿秘書監集賢學士成化杭州府志無擇  
治平四年以諫議大夫加龍圖閣學士知杭州常



作介亭於鳳凰山

趙抃

萬曆杭州府志

抃字閱道衢州西安人熙寧

三年以資政殿大學士知杭州十年復自越州移知建言錢氏有故廟在錢塘顙圮荒蕪請選僧道主管歲度其徒一人以供祭祀朝旨欲修城抃奏杭人罹旱乞罷役其爲政本於豈弟不嚴而肅議者謂抃治民雖西京所稱循吏不能過也

蘇頌

宋史本傳頌字子容泉州南安人父葬潤州

丹陽因徙居之第進士神宗朝吳越饑選知杭州



一日出遇百餘人哀訴曰某以轉運司責逋市易  
繒錢夜囚晝繫雖死無以償頌曰吾釋汝使汝營  
生奉衣食之餘悉以償官期以歲月而足可乎皆  
謝不敢負果如期而足頌宴客有美堂或告將兵  
欲亂頌密使捕渠領十輩荷杖付獄中迨夕會散  
坐客不知也及脩兩朝正史轉右諫議大夫

陳襄

四朝詩選襄字述古候官人舉進士累知詔

誥歷樞密直學士兼侍讀有古靈集二十五卷西  
湖遊覽志宋熙寧間六井皆廢民苦遠汲郡守陳



述古命僧仲文子珪等董其事發溝易甃補苴罅隙而相國之水清冽溢流千艘更載而貿之

蘇軾

宋史本傳軾字子瞻眉山入通判杭州熙寧

時新政日下軾每因法以便民民賴以安元祐四年拜龍圖閣學士知杭州出郊用前執政恩例遣內侍賜龍茶銀合慰勞甚厚既至杭大旱饑疫並作軾請於朝免本路上供米三之一復得僧度牒易米以救饑者明年春又減糶常平米多作饘粥藥劑遣使挾醫分坊治病活者甚衆杭水陸之會



疫死比他處常多乃裒羨緡得二千復發橐中黃金五十兩以作病坊稍畜錢糧待之杭本近海地泉醎苦居民稀少唐刺史李泌始引西湖水作六井民足於水白居易又浚西湖水入漕河自河入田所溉至千頃民以殷富湖水多葑自唐及錢氏歲輒浚治宋興廢之葑積爲田水無幾矣漕河失利取給江潮舟行市中潮又多淤三年一淘爲民大患六井亦幾於廢軾見茆山一河專受江潮鹽橋一河專受湖水遂浚二河以通漕復造堰牖以



爲湖水蓄洩之限江潮不復入市以餘力復完六井又取葑田積湖中南北徑三十里爲長堤以通行者吳人種菱春輒芟除不遺寸草募人種菱湖中葑不復生收其利以備脩湖取救荒餘錢萬緡糧萬石及請得百僧度牒以募役者堤成植芙蓉楊柳其上望之如畫圖杭人名爲蘇公堤浙江潮自海門東來勢如雷霆而浮山峙於江中與漁浦諸山犬牙相錯洄洑激射歲敗公私船不可勝計軾議自浙江上流地名石門並山而東鑿爲漕河



引浙江及谿谷諸水二十餘里以達於江又並山  
爲岬不能十里以達龍山大慈浦自浦北折抵小  
嶺鑿嶺二十五丈以達嶺東古河浚古河數里達  
於龍山漕河以避浮山之險人以爲便奏聞惡者  
力沮之功故不成人皆以爲恨軾二十年間再蒞  
杭有德於民家有畫像飲食必祝又生作祠以報  
六年召爲吏部尚書梁溪漫志東坡鎮餘杭遇遊  
西湖多令旌旗導從出錢塘門坡則自湧金門從  
一二老兵泛舟截湖而來飯於普安院徜徉靈隱



天竺間以吏牘自隨至冷泉亭則據案剖決落筆如風雨分爭辨訟談笑而辨已乃與僚吏劇飲薄晚則乘馬以歸夾道燈火縱觀太守有老僧紹興末年九十餘幼在院爲蒼頭能言之

楊蟠

萬曆杭州府志蟠字公濟章安人貫杭州登

慶曆六年第嘗賦西湖百咏詩歐陽修讀其集有詩云蘇梅久作黃泉客我亦今爲白髮翁卧讀楊蟠一千首乞渠秋月與春風王安石有答蟠書曰讀足下之文但知畏之蘇軾守杭蟠丞郡與軾唱



酬平生爲詩數千篇而百咏留傳至今猶可黼黻  
湖山云

周邠

錢塘志補邠字開祖錢塘人宋嘉祐八年進

士熙寧間東坡倅杭多與唱酬所謂周長官是也  
方東坡官杭時有會客有美堂周邠長官與數僧  
同泛湖詩又次韻述古過周長官詩又次韻答樂  
清尹周邠雁蕩山圖詩是邠嘗知永嘉之樂清縣  
事矣又西湖僧懷顯撰錢塘勝蹟記周邠爲序題  
曰朝請大夫輕車都尉此則邠之官階也



秦觀

四朝詩選觀字少游一字太虛高郵人登進

士第復舉賢良方正歷秘書正字有淮海集三十

卷

西湖遊覽志

少游遊龍井寺記云元豐三年中

秋後一日余自吳興道杭東還會稽龍井有辨才  
大師以書邀余入山比出郭日已夕航湖至普寧  
遇道人參寥遂棄舟策杖並湖而行出雷峰度南  
屏濯足於惠因澗入靈石塢得支徑上風篁嶺憇  
於龍井亭酌泉據石而飲行二鼓始至壽聖院謁  
辨才於潮音堂明日乃還



徐奭

西湖遊覽志

奭錢塘人隱居湖山以脩真終

老徽宗聞其名賜號冲晦先生咸淳臨安志奭以

徽宗朝賜號冲晦先生故廬在城中吳山下又嘗

居萬松嶺下

謹按宋時錢塘兩冲晦皆係賜號一名復真宗朝  
賜號冲晦處士一名奭徽宗朝賜號冲晦先生成  
化郡志列復於高隱列奭於方外此本之咸淳志  
至萬曆郡志列復於寓賢列奭於隱逸考奭為徽  
宗賜號徽宗崇尚道教當時方士得受先生之號  
似奭曾為道士故咸淳志列之方外也至二人所  
居之地今郡邑志多混載據成化志只言復所居  
之處沈文通榜曰高士坊今吳山之下尚有高士  
坊巷之名言其居在吳山者近是並不言居萬松  
嶺及考北窗炙輠言錢塘兩處士一林和靖一徐



冲晦和靖居孤山冲晦居萬松兩廬夾湖相望予嘗館於冲晦孫忉之居即冲晦故廬也據此則復實居萬松嶺豈奭亦居吳山又居萬松耶總因冲晦之名相同即咸淳志已不能分析何況後來作志者耶

徐炳

武林紀事錢塘徐立之名炳舉進士不第遂

隱於西湖之上自號回峰先生回峰即雷峰也都官員外郎蘇爲聞其名勸之仕曰若命與時會然後出佐天子福元元不然則悔吝生矣曷若追冥鴻霧豹與孤雲俱乎爲甚敬其言爲之立傳云

韓世忠

宋史本傳世忠字良臣延安人風骨偉岸



目瞬如電挽強馳射勇冠三軍建炎以來爲中興  
武功第一拜樞密使不以和議爲然爲秦檜所抑  
連疏乞解樞柄繼上表乞骸罷爲醴泉觀使奉朝  
請進封福國公節鉞如故杜門謝客口不言兵時  
跨驢攜酒從一二奚童縱遊西湖以自樂平時將  
佐罕見其面改潭國公封咸安郡王改鎮南武安  
寧國節度使薨進拜太師追封通義郡王孝宗朝  
追封蘄王謚忠武配享高宗廟世忠解兵罷政卧  
家凡十年澹然自如若未嘗有權位者晚喜釋老



自號清涼居士[武林紀事]世忠周遊湖山而於冷  
泉亭尤多盤桓又建亭於飛來峰之半顏曰翠微  
晚年嘗作小詞甚清逸

洪皓

[燉煌事蹟]皓字光弼江西鄱陽人建炎初假  
禮部尚書充金國通問使至雲中黏罕迫事僞齊  
不屈流遞冷山即陳王悟室聚落地苦寒大雪薪  
盡拾馬矢煨麪而食悟室銳欲南侵折之甚力留  
北連年懼通問失職使人求兩宮所在以桃李棗  
麪獻五國城中裕陵諱聞操文以祭辭極酸棘聞



者流涕書機事數萬言因謀者達帝紹興十三年  
與張邵朱弁全節歸朝見帝內殿求還鄉養母帝  
曰卿忠貫日月志不忘君雖蘇武不能過也豈可  
捨朕去因賜第於錢塘西湖之葛嶺命迎養其親  
朱弁

萬曆杭州府志弁字少章徽州婺源人紹興

二年遣使問安兩宮弁奮身自獻詔補脩武郎借  
吉州團練使爲通問副使即日與使者王倫同行  
至雲中遇黏罕邀說甚切遂留金金人百計迫之  
不屈十三年和議成得歸獻金國所得六朝御容



及宣和御書畫述北方所聞見事狀帝高其節有  
進用意秦檜沮之僅轉奉議郎十四年卒於臨安  
府白龜池之寓舍遺命歸葬不果權厝西湖智果  
院忠義之士莫不哀之後四十年從孫熹官浙中  
卜葬積善峰下

岳琚 咸淳臨安志 琚家於霍山爲臨安府吏建炎  
間金人犯境輸家財募勇士三百人推錢塘尉曹  
將金勝祝威爲首領迎敵死戰闔境以安里人懷  
其功即四聖延祥觀祠之



張澄

咸淳臨安志 紹興八年以右朝請大夫集英

殿脩撰知臨安府時臨安府臣任同京邑而澄有  
治劇才甚有時譽言臨安古都會引江爲河支流  
於城之内外交錯相通舟楫往來爲利甚溥歲久  
湮塞民頗病之乞因農隙濬治更不調夫興工刷  
那諸州壯城廂兵共千人量度開濬半年之外河  
流無湮塞矣從之除戶部侍郎紹興十四年以龍  
圖學士右宣奉大夫再知臨安府五月濬臨安府  
運河



湯鵬舉

咸淳臨安志 紹興十八年以左中奉大夫

直秘閣兩浙轉運判官除直敷文閣知臨安府十  
九年以西湖穢濁湮塞詔鵬舉措置遂用工開撩  
及脩砌六井陰竇水口增置斗門閘板量度水勢  
通放入井

尤袤

宋史本傳 袤字延之常州無錫人少穎異入

太學以詞賦冠多士尋冠南宮紹興十八年擢進  
士第累官至禮部尚書兼侍讀謚文簡萬柳溪邊  
舊話 袤築圃臨安之西湖度宗嘗幸其堂題屏間



曰五世三登宰輔弈朝累掌絲綸

范成大 萬曆杭州府志成大字致能吳郡人紹興

二十四年進士累遷著作佐郎除吏部郎知處州  
尋遷起居郎假資政殿大學士充祈請使全節歸  
除中書舍人累官吏部尚書叅知政事以病乞閒  
進資政殿學士再領洞霄宮居杭州棗木巷今巷  
西石湖橋因其號名橋也成大素有文名尤工於  
詩題咏湖山作詩甚多高宗嘗命陳俊卿擇文士  
掌內制俊卿以成大張震對上嘗書石湖二字賜



之

周必大

四朝詩選必大子充一字洪道廬陵人

登紹興二十年進士第名試館職累掌內外制歷  
左丞相拜少保益國公以少傅致仕謚文忠自號  
平園老叟有平園集周必大遊下竺御園詩序丁  
酉二月二十日同部中諸公遊下竺御園坐枕流  
亭觀放閘桃花數萬隨流而下至集芳園是時海  
棠滿山郁李滿澗殆不類人間世

周煇

兩浙名賢錄煇字昭禮淮海人紹興間居清



西湖志 卷一  
波門之南嗜學工文當世名公卿多折節下之藏  
書萬卷父子自相師友撰清波雜志十二卷

周淙 萬曆杭州府志淙字彥廣湖州長興人乾道  
三年以右朝請大夫直龍圖閣兩浙轉運副使知  
臨安府請置官卒專開撩西湖又奏渾水清水保  
安三閘已行脩治今欲差官一員充監閘官令管  
轄閘兵依時啓閉不住打撩河道免致湮塞詔可  
之嘗修乾道臨安志十五卷

樓鉉 樓鑰書從兄少虛不肯移社壇事兄諱鉉字



少虛嘗爲臨安府教授堅持規矩學者翕然師之  
光宗以東宮尹京內侍知省恃勢橫恣欲廣湖上  
園囿諷府中移寘社壇府命兄爲祝文兄執不可  
移書府少尹曰改移社壇就昭慶築壘某竊以爲  
社稷繫一府利害不可輕有改移社壇委是荒蕪  
止合芟治增築非旱乾水溢不宜變置社稷今六  
氣順序別無灾沴若令輕改神何所依祝史之文  
其將何辭揆之幽明事不穩便未敢製譔言雖未  
用而聞者歎服咸曰昔知其能文不謂風節如是



之高也

謹按毀社壇以廣園圃者孝宗朝內侍甘昇也時府少尹爲趙渭有州學教授入議狀遂建言祀典國之大事不宜輕徇閹寺之欲力爭之卒不可奪而止事見玉照新志然不詳其人第云或謂是石斗陸九淵未知孰是今考攻媿集係樓鑰之兄樓鉉所載沮毀社壇議甚詳書之以補王明清之缺

張杓

咸淳臨安志杓字定叟浚之子漢州綿竹人

淳熙十一年以承議郎直徽猷閣兩浙轉運副使知臨安府置脩江卒以禦潮疏積年湖壅三閘六井一一脩復十六年以兵部尚書再知臨安有內侍毛伯益占西湖菱池爲亭與外戚家輿僕以刃



交爭獄具夤緣求免杓曰吾官可去法不可屈執  
奏論如律

陳慤 宋濂陳府君墓碣 宋國子助教旦始自宜城  
徙杭生慤居萬松嶺慤字公實有文學一時名人  
如范元卿陸務觀辛棄疾咸與之游論者謂其氣  
節度量有郭元振之風

黃螢 弘簡錄 螢嘗從朱熹學熹深期之累官大理  
寺簿憤時不樂閒行西湖慨然曰吾昔在南北山  
一水一石無不品題今無復情況何耶



俞灝

咸淳臨安志 灝字商卿世居杭父徙烏程登

紹熙四年第仕東淮宣撫邱密令灝佐畢再遇往  
救山陽灝料敵必窺采石請回軍石梁河以遏其  
鋒敵擣虛不入而遁再遇知揚州蕩平湖海多灝  
計畫再遇欲誅脅從者救活甚衆開禧間議開邊  
政府密引灝言輕脫寡謀之人不可信趙良嗣張  
覺往轍可鑒歷旄節皆有聲寶慶二年致仕築室  
九里松買舟西湖會意處竟日忘返以詩詞自適  
號青松居士



孫惟信

西湖遊覽志惟信字季蕃仕宋光宗時棄

官隱西湖工爲長短句好藝花卉自號花翁家徒  
壁立無旦夕之儲彈琴讀書晏如也

宋斌

萬曆杭州府志斌袁州人少從黃榦李燔登

朱熹之門學禁方嚴羈旅困沮年且八十矣臨安  
尹趙與權延之事以父行奏乞用旌禮布衣故事  
不報死葬於西湖上與權歲一祭焉斌游大儒之  
門厯賢尹之禮其問學行誼有足稱者雖同寓居  
湖山而不得如林逋徐復顯被旌禮斯遇不遇之



異哉

張巨濟

四朝聞見錄巨濟字宏圖福清人嘉泰間

上書寧宗以慈懿攢陵今在湖曲若陛下遊幸則未免張樂此豈履霜露之義寧皇感悟其言旌轉一秩由此湖山遂無清蹕之聲非特儉德云御鷁至沉於波臣黃洪詩云龍舟大半沒西湖便是先皇節儉圖三十二年安靜裡棹歌一曲在康衢

袁韶

萬曆杭州府志韶字彥淳慶元府人嘉定十

三年爲臨安府尹在職幾十年都民感其惠政呼



爲佛子嘗作鄉賢祠於西湖之濱仍勒石贊之卒  
贈少傅後以郊恩累贈太師越國公

趙與篁

宋史本傳與篁字德淵太祖十世孫居湖

州嘉定十三年進士夢梁錄淳祐丁未大旱湖水  
盡涸郡守趙與篁奉朝命開濬自六井至錢塘上  
船亭西泠橋北山第一橋蘇堤三塔南新路長橋  
柳洲亭前等處凡種菱荷菱蕩一切薙去湖水如  
舊西湖遊覽志淳祐中京尹趙與篁自北新路第  
二橋至麴院築堤以通靈竺之路中作四面堂三



亭夾岸花柳以比蘇堤人稱趙公堤  
淨慈寺志與  
簑建壑雷亭於靈隱

趙師秀

四朝詩選  
師秀字紫芝號靈秀永嘉人嘗

登科改官有清苑齋集  
西湖遊覽志  
師秀旅寓杭州有終焉之志戀戀西湖以終其生

周密

淨慈寺志  
密字公謹寶祐間爲義烏令入元

不仕自號泗水潛夫詩極典雅善畫得意輒自題  
其上嘗著武林舊事西湖兩山名蹟備載頗稱該  
洽剡源文鈔  
周公謹與杭州楊承之大受有連依



之居大受和王諸孫其居之苑籞引外湖之水以爲流觴曲水大受捐其地之西偏以居公謹故公謹亦爲杭人

鄭起 井中心史鄭思肖父鞠山翁諱起淳祐間居西湖有水南半隱在長橋作水南半隱記

趙孟堅 西湖遊覽志孟堅字子固號彝齋宋諸王孫也脩雅博識善筆札工詩文酷嗜法書多藏三代以來金石名蹟遇其會意時雖傾囊易之不靳也又善作梅竹徃徃得逃禪石室之妙於山水爲



尤奇時人珍之襟度瀟然有六朝諸賢風氣時比  
之米南宮而子固亦自以爲不歉也東西薄遊必  
挾所有以自隨一舟橫陳僅留一席爲偃息地吟  
諷至忘寢食所至識不識望之而知爲米家書畫  
船也嘗客行都會菖蒲節周公謹偕一時好事者  
邀子固各攜所藏買舟湖上相與評賞飲酣子固  
脫帽以酒晞髮箕踞歌離騷傍若無人薄暮入西  
村橋掠孤山艤櫂茂樹間指林麓最幽處曰此真  
洪谷子董北苑得意筆也鄰舟皆歎以爲真謫仙



人

葛天民

西湖遊覽志

天民字無懷初爲僧名義銛

號樸翁後返初服居西湖上時所交遊皆名勝士  
嘗有西湖避暑詩云有暑猶當避無憂可得忘竹  
疎身共瘦湖近意先涼靜勝寧須弈幽期不當觴  
還同殘夢樂炙背負朝陽

潛說友

兩浙鹽法志

說友字君高縉雲縣人成化

杭州府志咸淳四年除司農少卿兼知臨安府至  
七年罷說友在官嘗修咸淳臨安志夢梁錄咸淳



四年守臣潛說友申請於朝乞除斥湖中菱荷毋得存留穢塞侵占湖岸之間

鮑度 夢梁錄咸淳中御史鮑度劾奏內臣陳敏賢劉公正包占水池蓋造屋宇濯穢洗馬無所不施一城黎元俱飲污濁之水起疾疫之灾奉旨令臨安府拆毀屋宇開闢水港湖中拆除蕩岸得以無穢污之患

陳均

兩浙名賢錄均字子公咸淳初除檢正會賈

似道以平章居湖濱欲以堂印自隨均爭曰堂印



無出城之理由是免官

謝翱

西湖遊覽志

翱字臯羽福之長溪人徙浦城

好佳山水遇即恣遊至元甲午來家西湖上前代  
遺老咸詫見翱晚也



西湖志卷十九



西湖志卷之二十

名賢二

元

吾邱衍

西湖遊覽志字子行仁和人操行高潔博

覽墳典工篆隸諳音律不求榮進隱居教授居一樓坐學童樓下遣高弟子遞授之客至童子輒止其登使登乃登與客笑談樓上而樓下羣童肅如也廉訪使徐琰聞衍名訪之衍從樓上呼曰此樓何敢當貴人登也願明日走謁謝琰笑而去明日



竟不謝人咸稱爲貞白先生後死於水西湖多寶  
院僧可權從子行學葬其遺文於後山與其師骨  
塔相對曰皆吾師也乞銘於胡汲仲汲仲爲之銘

鄧文原

西湖遊覽志鄧善之文原其先綿州人父

漳徙錢塘遂爲錢塘人至元中爲杭州路儒學正  
以春秋立教累官翰林侍講學士辭官還錢塘戴  
表元送砥平石歸天竺兼柬鄧善之詩云聞道西  
湖也自憐君行況是早春天六橋水暖初楊柳三  
竺山深未杜鵑舊壁苔生尋舊刻新巖茶熟試新



泉城中諸友須相覓西蜀遺儒正草元

申屠致遠

萬曆杭州府志致遠字大用壽張人至

元初授太常太祝宋平焦友直楊居寬宣慰兩浙  
舉爲都事首言宋圖籍宜上之朝江南學田當仍  
以贍學行省從之臨安改爲杭州遷總管府推官  
西僧楊璉真伽作浮屠於宋故宮欲取高宗所書  
九經石刻以築基致遠力拒之乃止至元二十年  
拜江南行臺監察御史改湖廣行臺卒官僉淮西  
江北道肅政廉訪司事致遠清修苦節恥事權貴



家無餘產聚書萬卷歷官多節槩云

徐琰

萬曆杭州府志琰字子方號養齋東平人用

薦以至元三十一年拜浙西肅政廉訪使嘗作戒

石銘曰天有明鑑國有公法爾畏爾謹以中刑罰

即宋太學故址改建書院遷西湖之鎖瀾橋北三

賢堂於書院置山長一員主之遂請於朝名西湖

書院琰有文學重望東南人士重之所謂以經術

飾治者

仇遠

四朝詩選遠字仁近錢塘人自號近村又稱



山村西湖遊覽志仁近元初爲溧陽州儒學教授  
工詩文一時遊其門者皆有名當時有同段吉甫  
泛湖詩秋日西湖園亭詩最稱合作馬思贊跋山  
村興觀集詩余從曹侍郎倦圃得山村手書詩一  
卷凡數十篇其卷首題興觀二字侍郎手錄而傳  
之名曰興觀集余并得之此侍郎所命名非山村  
故集名也山村家於杭湖山游詠之詩固多是卷  
多其游什想其蠟屐攜壺暢懷適志故作書亦見  
其興會颺舉耳



金應桂

成化杭州府志應桂字一之號蓀壁錢塘

人能詞章宋季爲縣令入元隱居風篁嶺書學歐

陽詢畫學李龍眠武林紀事一之標度風雅居西

湖南山中築蓀壁山房左絃右壺設圖史古器客

至撫摩諦玩清談灑灑不休每肩輿入城幅巾氅

衣望之若神仙然

楊載

四朝詩選載字仲弘浦城人徙家杭州初以

布衣召爲翰林國史編脩官延祐初登進士累官

寧國總管府推官西湖遊覽志載家錢塘與虞伯



生揭曼碩范德機齊名稱虞楊范揭洪武初祀於  
杭學鄉賢祠有和西湖竹枝詞

胡長孺

舊錢塘縣志字汲仲永嘉人少淹博至元

初薦入爲修撰以疾辭歸寓虎林山下誘引後學  
不倦其文章頗爲時所知屢典文衡年七十五卒  
有石塘文稿五十卷

鮮于樞

四朝詩選樞字伯機漁陽人西湖遊覽志

樞爲浙江行省都事因居杭州風流文雅與吳興  
趙子昂相伯仲遷太常簿子昂嘗貌其神虞伯生



贊之曰斂風沙裘劒之豪爲湖山圖史之樂翰墨  
軼米薛而有餘風流擬晉宋而無忤是以吳興公  
運畫沙之錐刻希世之玉使千載之下眼識二妙  
於遐邇伯機有鶴死命瘞之西湖士大夫多有詩  
悼之

趙孟頫

四朝詩選孟頫字子昂宋秦王德芳後居

湖州以廕補官仕元累拜翰林學士承旨卒追封

魏國公諡文敏萬曆杭州府志子昂以世胄仕元

觀其過鳳山故宮所爲詩有玉馬朝周之句其意



可見矣方立朝時矯矯自樹則其人固非貪冒寵  
利卒能以身致君踐清華以終老以其文行實方  
聞之士也

白珽

四朝詩選 珽字廷玉錢塘人以薦授官累遷

江浙儒學副提舉歷蘭溪州判官致仕自號栖霞

山人

靈隱寺志

廷玉結廬於金沙灘

西湖遊覽志

珽博綜經史方回劉辰翁稱其詩逼陶韋書逼顏  
柳嘗著西湖賦二首考據精核

高克恭

四朝詩選

克恭字彥敬其先西域人徙燕



之房山自省郎出爲江浙行省左右司郎中終刑  
部侍郎卒贈刑部尚書諡文簡輟耕錄克恭一日  
與客遊西湖見素屏雅潔乘興寫奇木古石後數  
日趙文敏公見之爲補叢石戶部楊侍郎得之虞  
文靖公題詩其上云不見湖州三十年高公讀書  
生古燕西湖醉歸寫古木吳興爲補幽篁妍國朝  
名筆誰第一尚書醉後妙無敵老蛟欲吼風雨來  
星墮天河化爲石趙公自是真天人獨與尚書情  
最親高懷古誼兩相得慘澹酬酢皆天真侍郎得



此自京國使我觀之三太息今人何必非古人淪落文章付陳迹此圖遂成三絕矣

貫雲石

[萬曆杭州府志]貫雲石元功臣阿里海涯

之孫也其父名貫只哥雲石遂以貫爲氏卜居鳳山門外自號酸齋名小雲石海涯生而神采秀異膂力絕人長折節讀書目五行下仁宗時爲翰林學士稱疾還江南賣藥錢塘市中結廬龍華山詭姓名易服色人無知者[七修類稿]雲石臨終作辭世詩云洞花幽艸結良緣被我瞞他四十年今日



西湖志 卷二  
不留生死相海天明月一般圓洞花幽草兩妾名  
也北山樓雲庵其藏脩之所

虞集

錢塘縣志集字伯生臨川人官至奎章閣學

士少遊錢塘西湖遊覽志伯生少不偶寓居錢塘

一日偕楊仲弘范德機訪微鍊師於湖西求名仙

鍊師置箕懸筆書符有頃箕動筆運書曰某當境  
神也欲乞虞公撰一保文申達上帝以求陞耳伯  
生許之翌日文成焚之湖濱逾旬再詣鍊師神復  
降曰某已獲授城隍謹候謁謝公必貴顯幸毋自



忽旣而伯生由校官至奎章閣侍書學士封仁壽郡公

張昱

列朝詩集昱字光弼廬陵人早遊湖海爲虞

集張翥所知楊左丞鎮江浙用才略叅謀軍事遷杭省左司員外郎行樞密院判官光弼詩酒自娛超然物表左丞死棄官不出張氏禮致不屈策其必敗題蕉葉以寓意居壽安坊今之花市也貧無以葺廬凌彥翀爲疏募馬萬曆杭州府志方張士誠時昱棄官不仕頗以詩酒自娛號一笑處士及



元亡高廟聞其名召見欲官之因其老曰可閑矣  
放歸故又號可閑老人昱每處西湖上麤衣糲食  
讀書賦詩以適其志所著有左司集行世

楊瑀

輟耕錄瑀字元誠錢塘人號竹西居士性警

敏博學長身紫髯元天曆間署廣成局副使尋擢  
建德路總管陞浙西宣慰初瑀在太史時上從容  
詢其鄉土對以西湖葛嶺之勝御書山居二字賜  
之因自號山居著有山居新語

黃潛

四朝詩選

潛字晉卿婺州義烏人以薦爲應



奉翰林轉國子博士浙學提舉至正中再起爲翰林直學士知制誥同修國史進侍講學士同知經筵卒謚文獻  
淨慈寺志晉卿自幼篤學博極羣書發爲文章如澄湖不波一碧萬頃與柳貫虞集揭傒斯游人號爲儒林四傑天曆初詔天下善書會杭州淨慈寺泥金書大藏尊經公與焉又爲寺撰諸塔銘

陳旅 四朝詩選旅字衆仲興化莆田人以薦除國子助教出爲江浙提舉召應奉翰林文字遷國子



監丞有安雅堂集西湖遊覽志衆仲元統初爲江  
浙儒學副提舉薩天錫贈詩云江南少識陳衆仲  
闕下才名北斗齊直閣每從花底見揮毫曾向御  
前題觀魚小海鳳新浴立馬上林鶯亂啼今日西  
湖堤上路獨騎款段踏春泥衆仲在任雅好湖山  
意有所屬便乘興獨往流連竟夕得佳句則欣躍  
而歸

揭傒斯

四朝詩選傒斯字曼碩龍興富州人以薦

授翰林國史編脩官遷翰林應奉累進侍講學士



同知經筵至正初召脩宋遼金三史充總裁官卒

諡文安

西湖遊覽志

學士溝在山南元時西湖堙

合好事者疏之以通小舟集賢學士揭曼碩祀南  
鎮弭節葛嶺見而助焉因名學士溝曼碩自爲記

張翥

西湖遊覽志

張仲舉翥其先晉寧人父爲杭

州鈔庫副使因家焉翥少時豪放不羈好蹴踘喜

音樂父憂之一旦翻然易轍閉戶讀書從仇仁近

學以詩文名海內累官至翰林學士承旨

武林紀

事翥在杭日久南北兩峰湖雲江月題咏殆遍詩



西清志  
卷二  
極清麗泠然可誦

楊維禎

〔四朝詩選〕

維禎字廉夫會稽人泰定丁卯

進士仕至江西儒學提舉明初召修禮樂書安車  
赴闕以白衣乞還自稱鐵笛道人〔西湖遊覽志〕維

禎初居吳山鐵冶嶺故號鐵冶旣得鐵笛更號鐵  
笛雅好聲伎名徹都下葉居仲寄之詩云聞道西  
湖載酒還飛瓊弱翠擁歸鞍可無私夢登金馬剩  
有春聲到玉鑾異國頓消鄉井念小堂新作畫圖  
看野人未納彭宣履獨向清溪把釣竿有四妾竹



枝柳枝桃花杏花皆善歌舞嘗以西湖竹枝詞寄  
崑山郭義仲義仲以吳中柳枝詞答之

葉廣居

西湖遊覽志葉居仲廣居仁和人天資超

邁才力過人仕至江浙儒學提舉築室西泠橋陶  
情詩酒所著有自得齋集自題隱居詩癭木栽冠  
鶴氅輕十年塵土厭飄零小山舊隱雲封戶大藥  
新成月滿庭丹井夜交龍虎氣碧霄春躡鳳凰翎  
西風客舍炎歎淨擬讀琴心內景經

周伯琦

四朝詩選伯琦字伯溫饒州人以蔭補南



海簿累擢監察御史廉訪浙西行省承制假參知政事詔諭平江張士誠拜江浙行省左丞七修類稿伯琦工真書篆隸而篆尤精予與中書葉天中遊於飛來峰之陰偶得篆記一篇攀蘿附木洗剔錄之遂知飛來峰石像之所出亦可補杭志之缺也

樊執敬

錢塘志補執敬字時中獨航其號世爲鄆人至政間爲浙江參政徐壽輝自徽犯浙西公以孤兵逆賊於天水橋戰死其妻與子溺於西湖杭



人立祠祭焉楊鐵厓爲文紀之又嘗見公作觀潮詩於霏雪錄中詩云煙波閃閃海門開平地潛生萬壑雷大信不虧人不死浙江亭上看潮來其平生之志可見矣

薩都刺

四朝詩選都刺別號直齋本答失蠻氏後

爲雁門人泰定乙卯進士應奉翰林文字累擢南臺御史以建言左遷歷河南廉訪使經歷有雁門集兩浙名賢錄天錫寓居武林博雅工詩文每風日晴美輒肩一杖掛瓢笠腳踏雙不借走兩山間



凡深巖邃壑人跡所不到者無不窮其幽勝至得意處輒席草坐徘徊終日不能去興至則發爲詩歌今兩山多有遺墨

黃公望

四朝詩選

公望字子久本姓陸世家常熟

繼永嘉黃氏遂徙富春有大癡山人集西湖遊覽志筭泉出赤山之陰合於惠因澗元時黃子久卜居紫桃軒雜綴嘗聞人說黃子久年九十餘碧瞳丹頰一日於武林虎跑泉方同數客立石上忽四山雲霧湧溢鬱渟片時遂不見子久以爲仙去



予向疑耽畫者飾之今繙道藏玉文金笈經公望  
編錄者非一其師則金蓬頭友則莫日鼎冷啓敬  
張三丰乃知此老原從十洲來繪事特其狡獪之  
一耳

錢惟善

〔都元敬詩話〕錢思復名惟善嘗赴江浙省

鄉試時出浙江潮賦三千人中皆不知錢塘江爲  
曲江思復獨用之蓋出枚乘七發考官得其卷大  
喜寘於前列思復歸乃構曲江草堂暮年自稱曰  
曲江老人有江月松風集



西清志林 卷二  
陳栢

四朝詩選栢字新甫號雲嶠泗州人常為侍

儀舍人官至太祝萬曆杭州府志栢性豪宕結客

嘗被命監鑄祭器於杭無錫倪元鎮慕其名來見  
之張宴湖山間羅設甚盛酒終為別以一帖餽米  
百石栢命從者移置近所舉觥引妓樂趣從者而  
前悉分散之顧倪曰吾在京師即熟爾名云江南  
士之清者他無與比其所以章章者蓋以米沽之  
也請從今日絕交時張伯雨在坐不勝跼蹐其豪  
氣類如此平日喜居錢塘好古有餘而治才不足



又不樂小官年逾六十不得志而卒

遼西臯

西湖遊覽志

西臯者元左丞相魯曾孫也

占籍錢塘工文翰有雅趣仕行省都事後棄官居西湖年八十五卒

陳基

錢塘縣志

字敬初臨海人九歲與兄聚從師

於杭寓觀橋之陋巷夜雨暴至張蓋就寢不顧自扁其軒曰三歎讀書不輟已而受學黃潛授經筵檢討尋轉江浙行中書省郎中請葺岳飛墳祠致祭自爲文刻石墓上出官錢補刊西湖書院經史



板洪武初召修元史書成賜金還卒於道有夷白  
齋稿二十卷

明

莫惟賢

凌雲翰莫隱君墓誌隱君名昌初名惟賢

字景行少穎悟知爲學長益俊邁知克家九世以  
宗遠澤斬思振家聲大治第河西扁其堂曰有政  
合家族以居之受教山村仇先生兼通詩傳延祐  
賓興時年十九一試不售則曰吾寧藏璞勿再刖  
翰林待制楊剛中舉辟授以右職亦不起有別業



在南山下作屋介兩山間命曰兩山始有隱念交  
日衆學日富尤通佛老之說遂以廣莫子自號後  
感瓊館玉蟾師授以內外丹訣遂有得焉以別業  
稍近市喧復卜居於下瀨亭扁曰留暉用和靖詩  
也後復徙居南屏別業其處頗多景物勝槩因人  
而成若輞川之南堂遂爲二十一題多賦之者洪  
武三年始建學立師爲英才首君以詩經爲杭州  
府學訓導教成一鄉之俊士後以疾辭訂平昔所  
爲詩詞等號廣莫子稿又和陶集纂名物抄若干



篇藏於家兩浙名賢錄維賢錢塘人好學能詩雅  
尚標致築別業於靈隱天竺間繞屋栽杏號曰杏  
園日與騷人墨客游詠其中列二十一題時人比  
之輞川

楊復初

西湖遊覽志復初築室南山以村居爲號

杜彬

凌雲翰吳山隱夫傳彬居吳山人咸以吳山

隱夫稱之所居當吳山之勝過者甚衆其人顏蒼  
而冰髮皓而澤目紺而朗膚積而腴壯而仕老而  
隱以青囊之術鳴於時



張輿 · 西湖遊覽志 張行中輿仁和槎溪人洪武初  
上書論時務稱旨授刑部主事詞翰清麗有約可  
閒老人訪玉藥圃詩明朝寒食風日晴可閒欲同  
湖上行君若肯將花徑掃日高相與款柴扃

徐一夔

西湖遊覽志 一夔字太章天台人洪武六

年以儒士薦授杭州府學教授博雅通經教法嚴  
整爲文有法度士林服之召入纂修元史賜蟒衣  
復任在任凡九年所著有始豐稿湖上勒石之文  
多其手筆



高得暘

西湖遊覽志高孟升得暘錢塘人洪武間

以文學薦授臨安學教諭陞高州學教授永樂初  
召爲宗人府經歷纂脩大典爲副總裁記聞博洽  
詩文純雅名重一時所著有節庵集嘗作錢塘十  
景詩詞調俊逸風致可想也

劉儼

列朝詩選儼字敬思自號樗隱錢塘人元世

不仕隱居西湖之上明徵入修禮樂書方輿續編  
授廣東市舶司未幾卒

瞿佑

西湖遊覽志佑字宗吉錢塘人學博才瞻風



致俊朗洪武中以薦舉授臨安學訓導遷周府長史著有西湖四時望江南詞

謝肅

靜志居詩話

肅字原功上虞人舉明經歷官

按察僉事謁貢禮部玩齋於吳山仰高亭進曰先生之門亦有瑰偉倜儻拔出之士乎時貢奉詔漕閩廣粟當泛舟大海貢語曰子能從吾游乎對曰丈夫觸蛟龍犯風濤如行衽席上爾遂同載至海昌屬海上多警因留居州北執經問難凡一詩一文折衷論議必當於理乃已既而貢沒於寓舍原



功經紀其喪

方孝孺

列朝詩集

孝孺字希直一字希古世居臨

海召至京除蜀王府教授獻王師事之號其讀書

之室曰正學學者稱正學先生建文帝召爲翰林

博士進侍講靖難時以死殉西湖遊覽志希直之

從學於太史宋景濂也相得甚歡嘗從景濂宿南

屏山晨起對雪浩飲高歌意氣慷慨後數年景濂

歿而鄉人有王生者偶寫南屏對雪圖索詩於希

直希直閱之感歎陳迹遂題詩云昔年歲暮京國



還艤舟夜宿南屏山山風吹雪天欲壓夜半大雪  
埋江關清晨倚樓望吳越六合玉花飄未絕恍疑  
江水駕山來萬頃銀濤湧城闕山僧好事喜客留  
置酒開筵樓上頭玉堂仙人宋夫子紅顏白髮青  
貂裘坐讀古今如指掌共看雲收月華上寒輝素  
彩相摩蕩碧海瑯臺迭蕭爽酒酣擊節心目開慷  
慨弔古思英才荒祠古栢岳王墓廢湖殘柳蘇公  
臺一時佳會難再得仙人天上塵世窄王子何年  
繪此圖正貌南屏舊遊跡吾知王也奇崛人新詩



妙筆俱絕倫偶然揮灑豈無意神授髣髴存天真  
世間今古同飛電回首人豪都不見空有蘿山石  
室書夜夜虹光射霄漢蓋其時景濂已謝病還山  
而希直自海上來迓邂逅於南屏師生道義之情  
湖山增重矣其曰蘿山石室乃景濂讀書精舍也  
周新 萬曆杭州府志新字志新廣東南海縣人永  
樂中官御史彈劾不避貴戚憚之呼爲冷面寒鐵  
擢浙江按察使嘗斥西湖侵占以備旱凡雄據於  
豪右者悉奪還之由是勢家交怨竟爲錦衣指揮



紀綱所陷瀕死矯矯無片辭撓詘上尋悟其枉他  
日若見有人被朱袍立庭中語上曰上帝以臣剛  
直命爲浙江城隍言訖不見今杭人以五月十七  
日祠於吳山城隍廟爲其始生之辰云

聶大年

〔西江志〕大年字壽卿臨川人生而一目重

瞳比長博學善詩古文書得歐陽率更法兩湖塵  
談大年任仁和學官最久好吟詠凡西湖兩山及  
杭城文物之家多留題其詩平妥流暢其書真行  
皆佳故翰墨往往爲三吳取重



孫蔗田 萬曆錢塘縣志不知何名隱於西溪不受  
徵聘以詩文自娛所著有蔗田集與同邑包太白  
名行相參人目爲西溪二隱

杜庠

列朝詩集庠字公序長洲人景泰甲戌進士

除攸縣知縣頃罷歸公序負逸才在都下會飲陸  
孟昭館中海內詩人畢集雲間張汝弼拱揖曰此  
過赤壁題驚人句杜先生也持酒爲壽仕不得志  
放情詩酒往來湖浙間自稱西湖醉老有江浙歌

風集



莫璠

萬曆錢塘縣志

璠字仲璵隱居西湖與劉士

亨爲詩友讀史慨然慕謝安石文文山謝疊山之  
爲人意氣橫發有古烈士風

吳訥

萬曆杭州府志

訥字敏德常熟縣人由薦任

監察御史宣德初按浙風裁凜然下車即採歌謠  
行舉刺嘗修岳武穆墓高宗石經有秦檜諸跋毀  
之皆有關風勸終左副都御史謚文恪

于謙

列朝詩集

謙字廷益錢塘人永樂十九年進

士宣德初授山西道御史越五年超行在兵部右



侍郎巡撫梁晉歷十八年己巳北狩拜兵部尚書  
歷陞少保裕陵復辟死西市茂陵念其忠賜諡肅  
愍更諡忠肅事具國史公少英異過目成誦文如  
雲行水湧詩頃刻千言弈弈俊爽田叔禾西湖志  
餘摘其七言今體如香熟雕盤籠睡鴨燈輝青瑣  
散棲鴉紫塞北連天末去黃河西繞郡城流風穿  
疎牖銀燈暗月轉高城玉漏遲天外冥鴻何縹緲  
雪中孤鶴太淒清醉來掃地卧花影閒處倚牕看  
藥方渭水西風吹鶴髮嚴灘孤月伴羊裘野花偏



向愁中發池草多從夢裡生皆佳句也夏日憶西湖詩云湧金門外柳如煙西子湖頭水拍天玉腕羅裙雙蕩槳鴛鴦飛近採蓮船

于冕

萬曆杭州府志冕字景瞻少保兵部尚書謙

之子景泰初以父功蔭府軍千戶及謙被譖死冕坐謫戍龍門憲廟初事得白加謙官謚因復冕官改文資歷南京太僕寺少卿應天府尹致仕西湖遊覽志弘治初景瞻自南都謝事歸杭號南湖歸叟



夏時正

陳守陞大理卿夏公神道碑公諱時正字

季爵正統十年進士爲刑部主事陞郎中奉敕錄  
囚福建平反死獄六十餘人陞大理寺丞改南太  
常卿成化五年陞南大理寺卿七年歲大侵命大  
臣分道巡視公至江西興發勸分賑濟饑民二十  
三萬戶裁省諸司冗濫力役數萬人罷黜不職庶  
官二百人所至命有司興學勸士條析兵民利弊  
而興革之遠近悅服長河洞流民嘯聚有司不能  
禁公親臨其境諭以禍福民感泣羅拜境內帖然



南昌城章江門外每歲夏秋之際降水挾風濤爲患嚙城址浸淫民居名監司會計帑羨分遣官屬脩固城壘增築瀕江之隄及豐城諸縣陂岸皆江西百世之利也旣還南京明年以疾乞致仕歸杭至僦室以居布政使張贊等重建西湖書院於孤山以處公久之書院火歸慈谿弘治十二年布政司楊峻迎還杭舍於歸錦坊日著書屬文壽八十八西湖遊覽志時正致仕布政司甯良作西湖書院聘時正主之四方文學雲集嘗作詩蓬湖中隨



風往來

何琮

分省人物考 琮字文璧仁和人景泰庶吉士

除禮科給事中歷官兵部侍郎居官清介門無雜

賓立朝幾四十年勤慎如一日公餘歸私宅縱步

花徑間口不絕吟嘗以西湖爲杭之眉目近爲居

民占據恐其久而易湮言之當道聞於朝而疏浚

之又著西湖圖說以示後人羣推爲不可及李旻

濬治西湖議 成化十九年巡視都御史劉敷用杭

人通政何琮言臨湖查勘凡宣德正統等年圈築



報稅者一切鋤而去之稅糧百三十餘石派堤西  
有產之家代納

張維

書畫譜維字叔維常熟人畫筆宗董北苑吳

仲珪游跡多在西湖自號西泠寓客故煙巒出沒  
得吳越諸山之神詩才清逸程孟暘數稱之

邵琮

萬曆杭州府志琮字叔璋仁和人登天順進

士授大理評事累擢四川按察司副使未幾致仕  
歸徜徉湖山足跡不入公府人高其賢

張錫

西湖遊覽志張天錫錫錢塘人號海觀天才



拔萃文雄一時領天順壬午鄉薦授山西山陰縣  
教授解官南還湖山名勝之所燕集無虛日人以  
鐵厓方之

張寧

海鹽縣圖經寧字靖之其先德清人景泰五

年進士授禮科給事中拔掌科陞都給事知府汀  
州致仕歸家居三年卒西湖遊覽志靖之海寧人  
號方洲景泰天順中爲給事中有名奉使朝鮮國  
人雅重之集所著作爲皇華錄成化初忤權要出  
爲汀州知府引疾歸田雅好山水歲率一再至杭



州至輒攜親朋出遊西湖綵舟蠟屐隨意所之大  
篇短章頃刻立就又善丹青所著有方洲集

孫原貞

萬曆杭州府志原貞名瑀以字行江西德

興縣人永樂戊戌進士正統八年來爲浙江左布  
政誠信愛民忠誠體國處州盜起發兵勦捕軍需  
旁午列郡騷然原貞經畫有方供應不匱事集而  
民不病進拜副都御史督兵深入戮其渠魁羣盜  
悉平拜兵部尚書錢塘縣志景泰七年鎮守浙江  
兵部尚書孫原貞建議築修西湖二閘



洪鐘

王守仁襄惠洪公墓誌公名鐘字宣之成化

戊子領鄉薦乙未舉進士授刑部主事總諸司章  
奏聲聞大起陞員外郎仍領諸司事陞郎中慮因  
山西弘治己酉陞江西按察副使四川按察使所  
在發奸摘伏無所撓避而聽決如流庭無宿訟由  
是豪右屏息土官宣慰司皆凜凜奉約束安氏世  
有馬湖恃力驕僭爲地方患從容畫策去之請吏  
於朝遂以帖然陞江西右布政使轉福建左布政  
著績兩省陞都察院右副都御史巡撫順天兼整



薊州諸邊備建議增築邊牆自山海關界嶺口西北至密雲古北口黃花鎮直抵居庸延亘千餘里繕復城堡三百七十悉城沿邊諸縣官無浪費而民不知勞緩急有賴又奏減防秋官兵六千人歲省輓輸犒賞之費以息軍民橫役之苦奪民產及牧圉草蕩之入於權貴者悉還之遠近大悅改雲南巡撫再改貴州名還督理漕運兼巡撫鳳陽諸處正德乙卯陞右都御史掌南京都察院事尋陞南刑部尚書改北工部復改刑部兼都察院左都



御史加太子少保賜玉帶出總川陝湖河四省軍  
務沔陽洞庭水寇邱仁楊清等攻掠城邑以計擒  
滅之藍五起蜀與鄆老人等聚衆寇暴川陝間遠  
近騷動遂涉歷險阻深入賊巢運謀設奇躬冒矢  
石前後斬獲招降十數萬擒其渠酋二十八人露  
布以聞土官楊友楊愛相仇激爲變衆至三萬流  
劫重慶保寧諸州縣調兵勦平之朝廷七降勅獎  
勵賜白金麒麟服進太子太保引年乞歸章七上  
始允賜馳驛還歸築兩峰書院於西湖上自號兩



峰居士與朋舊徜徉詩酒以爲樂如是者十一年  
詔遣有司勞問思復起於家而公已不可作矣

洪鎡

錢塘志補鎡字器之號時軒錢塘人襄惠之

弟攻苦讀書勇於爲學寒暑不輟詩文楷法俱超  
軼絕倫商文毅公聞其名辟置幕下薦授中書舍  
人欲大用之而性恬淡不樂仕進歸隱西溪以圖  
書消歲月或栽花蒔竹借以自娛時與農夫鄰老  
課晴問雨究桑麻之事嘗慕林處士高風讀其集  
稱賞不置襄惠數歷中外屢遣人招之俱不赴及



官尚書欲薦於朝力止之其高蹈如此著有時軒  
自怡集二十卷

胡濬

萬曆杭州府志濬江西鉛山人正統乙丑進

士天順元年陞杭州知府敏於聽斷處劇郡日有  
清讌八年卒於官民哀思不忘設主孤山以報祀  
焉

劉璋

萬曆杭州府志璋字廷信福建南平縣人天

順丁丑進士成化六年任浙江布政使公平正大  
治體精明燭奸革弊吏不敢欺凝重潔白卓有大



臣風度終工部尚書太子少保歷官四十載敝屋  
蕭然西湖遊覽志成化十七年布政使劉璋按察  
使楊繼宗等清理西湖續占

楊繼宗

西湖遊覽志西湖元廢而不治任民規竊

明初籍之遂起額稅蘇堤以西盡爲阡陌至成化  
十七年御史謝秉中布政使劉璋按察使楊繼宗  
等清理續占繼宗山西人成化九年爲嘉興知府  
十六年陞浙江按察使不攜家眷止帶老僕一人  
執爨清直之聲震兩浙鎮守太監張慶權勢烜赫



門下多倚勢生事繼宗蒞任各斂手杜門不敢出  
貪猾官吏多望風引去然繼宗雖嫉邪而愛惜人  
才故人咸仰其公正親喪方坐廳事訃至即解印  
綬步出驛亭老僕挑兩箬籠登舟杭民老稚挽留  
不及皇皇如失父母

劉泰

兩浙名賢錄泰字士亨錢塘人負奇志特立

不羣景泰天順間隱居武林山中好學篤行肆其  
餘力於詩精麗奇偉爲一時絕唱西湖遊覽志泰  
號菊莊所著菊莊晚香諸集有次聶大年遊淨慈



寺詩書於壁間按察使泰和曾蒙簡見之謂僚案  
曰如此閒情我輩不及也兩湖塵談菊莊雅負詩  
名杭人與賓山匹休因有二劉之目

馬洪

兩浙名賢錄洪字浩瀾錢塘人以辭賦擅名

清脩苦節皓首韋布而含珠吐玉聲價益重所交  
皆一時名士每過從出遊衣冠雜集車從都雅洪  
獨葛巾草履高步其間人望之若野鶴之在雞羣  
也西湖遊覽志浩瀾號鶴牕善詩賦而詞調尤工  
徐伯齡言鶴窗與陸清溪皆出菊莊之門清溪得



詩律鶴窗得詞調異體齊名著花影集自序云月  
下燈前無中生有以爲假則真謂爲實猶虛也

徐鎡

兩湖塵談明農先生徐鎡兵部尚書貞襄公

之子貞襄賜葬南山之原土名陸家塢鎡方襄事  
之際得誌石焉謂是宋金樞密淵之墓遂掩其穴  
移上葬之此忠厚之道近世所無也

夏時

成化杭州府志

時字以正錢塘人永樂戊戌

進士授戶科給事中改南京戶科宣德二年署尚  
寶司兼吏禮兵刑工科事視七印楊士奇稱其忠



而敢言陞江西按察司僉事布政司叅議廣西左  
右布政使前後所上疏皆時務緊切時論避之年  
七十致仕卒時天性孝友親喪廬墓三年不御酒  
肉晝夜悲泣有羣鳥巢於墓木祭酒李時勉爲著  
傳萬曆杭州府志夏時德行足爲鄉邦矜式共謀  
建祠於石人嶺以祀之請於郡守張禧事聞當道  
咸共嘉歎題其祠曰孝廉云陳贄湖山勝槩序方  
伯夏公以正以湖山勝槩記一通見示凡靈蹤秘  
跡杭人所莫識者歷歷如指掌可考而有據何其



博也兼賦絕句百首悉用董嗣杲之舊清新蘊藉  
令人興懷古之思

陳贄

餘姚縣志贄字惟成銳於經史薦爲儒學訓

導纂脩宣廟實錄兩浙事蹟皆贄採摭稱良史才  
任翰林待詔陞廣東叅議兵後訪民間掠賣者還  
之瘞暴骨遷太常少卿致仕投老西湖與騷人墨  
客爲詩酒會萬曆杭州府志贄本餘姚人愛錢塘  
山水之勝構別業於武林城北及卒特賜祭以榮  
之所著有自怡容臺諸稿程敏政西湖百詠倡和



詩序太常會稽陳惟成博學多才尤長於詩其致政而歸也樂錢塘山水之勝日與名公碩彥往來西湖之上得宋季董靜傳西湖百詠和之好事者爭相傳誦焉

姚文舊錢塘縣志文杭州前衛人事母盡孝每晨出必拜母而往暮還如之母卒擇地於玉泉山下詰旦有鹿聚其地跪成穴遂葬焉其孝感如此天順三年旌表

朱鏞

張寧廣西布政司叅政朱公墓誌公諱鏞字



廷用號恒菴景泰丙子領鄉薦明年登柯潛榜進士授南兵部職方主事改工部陞郎中出知廬州府秩滿尋有廣西之命致仕歸與大理卿夏公季爵憲副張公鳴玉都閫徐公彥章數人觴咏迭會於西湖山水之間號歸榮雅會

陸偉

分省人物考偉字仲奇號質菴錢塘人成化

乙酉鄉薦授澤州知州政通人和小民戴德而怨家訛謗歎曰人當知止足力懇當路致事而歸與鄉之不仕及倦而歸者徜徉於西湖孤山間更唱



迭和有歸田錄傳於時居常甘淡薄於世味漠如  
也年至耄耄燈下能讀細字喜吟詩有稿藏於家  
梁萬鍾 萬曆杭州府志 萬鍾字天錫四川溫江縣  
人成化戊戌進士知仁和縣興利舉廢子惠之聲  
浹於里巷邑人肖像祀之三原王公重其人擢知  
杭州府浚西湖以瀦水使旱潦有備新岳武穆王  
祠陞兩浙轉運使人稱循吏

劉英

西湖遊覽志

劉邦彥英錢塘人號賓山善詩

翰成化間隱居不仕遨遊湖山名振遠近舊錢塘



西清志林卷二  
縣志邦彥自幼篤學操行高潔其爲詩清奇俊逸  
灑然出塵與劉士亨趙廷玉霍孟賜俞鳴玉結會  
賦詩所至題咏湖山英長篇短章備極工巧名振  
一時程敏政劉君賓山墓誌其居在北郭之夾城  
里

李旻

錢塘縣志旻字子陽成化間鄉試廷對皆第

一授翰林院脩撰上疏終養不許官至南京吏部  
侍郎長身修髯才識高邁於學無所不窺善談議  
每發言如倒峽懸河四坐傾聽爲司成時教範嚴



肅家吳山下環堵蕭然不屑治家人業

陳士寧

嘉靖仁和縣志士寧仁和人涉獵書史喜

延接賢士大夫與同邑鄭壁夏誠友不事榮利日  
爲湖山遊詠有遊詠錄行於世搜蓄古法帖名畫  
及彝器之屬暇時過訪互相品鑒

項承恩

錢塘志補承恩字寵叔新安人屢試不第

遂隱西湖岳墳攜一女奴供爨竒醜室中雜置書  
籍畫卷盆花竹石禾中李日華贈以詩曰西湖流  
水供濯足南屏山色對梳頭月夜酣眠琴作枕雪



朝孤坐絮爲裘盆花巧作千金笑壁畫貲高萬戶  
侯何用更尋高士傳先生風格在林邱有訪沈石

田畫一扇深得子久家法自題云陰陰茅屋野人

栖望裏煙波咫尺迷約伴攜尊釣斜日從來浪跡

寄山溪萬曆癸未季春余與徐企孺許思德游飛

來峰旣而思德仲兄沂春爲作記且邀談竟日出

書畫縱觀甚歡因寫於沂春扇背題短句見意云

吳循吾

六研齋筆記循吾歙縣人少豪放喜聲律

晚年落拓寓居武林吳山松關竹屋翛然如在塵



外家有伽楠大士像大者高三尺小者尺餘供室  
中奇香溢於戶外



西湖志卷之二十



